

भारत सरकार  
GOVERNMENT OF INDIA  
राष्ट्रीय पुस्तकालय, कलकत्ता ।  
NATIONAL LIBRARY, CALCUTTA.

वर्ग संख्या

Class No.

पुस्तक संख्या

Book No.

रा० पु०/ N. L. 38.

B

891.442

D 562 pad

MGIPC—S4—9 LNL/66—13-12-66—1,50,000.

# পদ্মাবতী নাটক ।

শ্রীমাইকেল মধুসূদন দত্ত  
প্রণীত ।



তৃতীয়বার মুদ্রিত ।

কলিকাতা ।

শ্রীযুত ঈশ্বরচন্দ্র বসু কোং বহুবাজারস্থ ২৪৯ সংখ্যক ভবনে  
ফ্যানুহোপ্ যন্ত্রে মুদ্রিত ও প্রকাশিত ।

সন ১২৭৬ সাল ।

## নাট্যোল্লিখিত ব্যক্তিগণ ।



ইন্দ্রনীল । ( রাজা ) ।  
মাণবক । ( বিদূষক ) ।  
রাজমন্ত্রী ।  
দেবর্ষি নারদ ।  
মহর্ষি অঙ্গিরা ।  
মাহেশ্বরীপুরীর রাজ-কঙ্কী ।  
ঐ পুরোহিত ।  
কলি ।  
সারথি ।

---

শচীদেবী ।  
রতিদেবী ।  
মুরজাদেবী ।  
পদ্মাবতী ।  
বসুমতী । ( সখী ) ।  
মাধবী । ( পরিচারিকা ) ।  
গোঁতমী । ( তপস্বিনী ) ।  
রস্তা । ( অপসরী ) ।

---

নাগরিকগণ, রক্ষকগণ, ইত্যাদি ।

# পদ্মাবতী নাটক ।



প্রথমস্ক ।

বিজ্ঞাপিণি ;—দেব-উপবন ।

( ধনুর্কীর্ত্তন হস্তে রাজা ইন্দ্রনীলের বেগে প্রবেশ । )

রাজা । ( চতুর্দিক্ অবলোকন করিয়া স্বগত ) হরিণটা দেখতে দেখতে কোন্ দিকে গেল হে ? কি আশ্চর্য্য ! আমি কি নিদ্রায় আবৃত হয়ে স্বপ্ন দেখছি ? আর তাই বা কেমন করে বলি । এইত ভগবান্ বিজ্ঞ্যাচল অচল হয়ে আমার সম্মুখে রয়েছেন । ( চিন্তা করিয়া ) এই পর্ক্কতময় প্রদেশে রথের গতির রোধ হয় বল্যে, আমি পদত্রজে হরিণটার অনুসরণ ক্লেশ স্বীকার কর্যে, অবশেষে কি আমার এই ফল লাভ হলে, যে আমি একলা একটা নির্জ্জন বনে এসে পড়্লেম ? মৃক-ভূমিতে মরীচিকা বারিরূপে দর্শন দেয় ; তা এস্থলে কি সে মায়ামৃগ হয়ে আমাকে এত বৃথা দুঃখ দিলে ? সে যা হোক, এখন এখানে কিঞ্চিৎকাল বিশ্রাম কর্যে এ ক্লাস্তি দূর করা আবশ্যিক । ( পরিত্রমণ করিয়া ) আহা ! স্থানটি কি রমণীয় ! বোধ করি এ কোন্ যক্ষ কিম্বা গন্ধর্কের উপবন হবে । প্রকৃতি, মানব ক্লেমতির লোচনানন্দের নিমিত্তে, এমন অপকৃপ রূপ কোথাও ধারণ করেন না । আমি এই উৎসের নিকটে শিলা-

তলে বসি । এ যেন কলকল রবে আমাকে আহ্বান কচে ।  
( উপবেশন করিয়া সচকিতে ) একি ? এ উদ্যান যে সহসা  
অপূৰ্ণ সুগন্ধে পরিপূর্ণ হতে লাগলো ? ( আকাশে কোমল  
বাদ্য ) আহা ! কি মধুরধ্বনি ! কি—? ( সহসা নিদ্রারত  
হইয়া শিলাতলে পতন । )

( শচী এবং রতির প্রবেশ । )

শচী । সখি, সুরপতির কথা আর কেন জিজ্ঞাসা কর ।  
তিনি ছুই দৈত্যবংশ কিসে সমূলে ধ্বংস হবে এই ভাবনায় সদা  
স্বর্বেদাই ব্যস্ত থাকেন । তাঁর কি আর সুখভোগে মন আছে ?  
রতিদেবি, তুমি কি ভাগ্যবতী ! দেখ, তোমার মন্থ তিলা-  
ক্লেঁর জন্যেও তোমার কাছ ছাড়া হন না ! আহা ! যেমন  
পারিজাত পুষ্পের আলিঙ্গন-পাশে সৌরভমধু চিরকাল বাঁধা  
থাকে, তোমার মদনও তেমনি তোমার বশীভূত ।

রতি । সখি, তা সত্য বটে । বিরহ-অনল যে কাকে বলে  
তা আমি প্রায় বিস্মৃত হয়েছি । ( উভয়ের পরিক্রমণ ) কি  
আশ্চর্য্য ! শচীদেবি, ঐ দেখ তোমার মালতী মলয়মাকতের  
আর্গমনে যেন বিরক্ত হয়ে তাকে নিকটে আসতে ইচ্ছিতে  
নিবেধ কচে ।

শচী । করবেনা কেন ? দেখ, ইনি সমস্ত দিন ঐ নির্মূল  
সরোবরে নলিনীর সঙ্গে কেলি করে কেবল এই এখানে আস-  
চেন । এতে কি মালতীর অভিমান হয় না ? আর আপনার  
গায়ের গন্ধেই ইনি আপনি ধরা পড়ছেন ।

( মুরজা দেবীর প্রবেশ । )

কি গো, সখি মুরজা যে ? এস, এস । আজ তোমার এত  
বিরস বদন কেন ?

মুর । ( দীর্ঘনিশ্বাস পরিত্যাগ করিয়া ) সখি, আমার  
ছুঃখের কথা আর কাকে বলবো !

রতি । কেন, কেন ? কি হয়েছে ?

মুর । প্রায় পনের বৎসর হলো পার্শ্বতী আমার কন্যা  
বিজয়াকে পৃথিবীতে জন্মগ্রহণ কতে অভিশাপ দেন ; তা  
সেই অবধি তার আর কোন অনুসন্ধান পাই নাই ।

শচী । সে কি ? ভগবতী পৃথিবী না তাকে স্বর্গে ধারণ  
কতে স্বীকার পেয়েছিলেন ?

মুর । হাঁ—পেয়েছিলেন আর ধরেও ছিলেন বটে । কিন্তু  
তার জন্ম হলে তাকে যে লালন পালনের জন্যে কার হাতে  
দিয়েছেন এ কথাটা তিনি কোনমতেই আমাকে বলতে  
চান্না । আমি আজ তাঁর পায়ে ধরে যে কত কেঁদেছি,  
তা আর কি বলবো ?

রতি । তা ভগবতী তোমাকে কি বললেন ?

মুর । তিনি বললেন—“ বৎসে, সময়ে তুমি আপনিই  
সকল জানতে পারবে । এখন তুমি রোদন সম্বরণ করে  
অলকায় যাও । তোমার বিজয়া পরম সুখে আছে ।”

শচী । তবে, সখি, তোমার এ বিষয়ে চঞ্চল হওয়া কোন-  
মতেই উচিত হয় না । আর বিবেচনা করে দেখ, পৃথিবীতে  
মানুষের জীবনলীলা জলবিষের মতন্ অতি শীঘ্রই শেষ হয় ।

মুর । সখি, বিজয়ার বিরহে আমার মন থেকে থেকে যেন  
কেঁদে উঠে ! হায় ! জগদীশ্বর আমাদের অমর করেও ছুঃখের  
অধীন কল্যে ।

শচী । সখি, বিধাতার এ বিপুল সৃষ্টিতে এমন কোন ফুল  
আছে যে তাতে কীট প্রবেশ কতে না পারে ?

( দুরে নারদের প্রবেশ । )

নার । ( স্বগত ) আমি মহর্ষি পুলস্ত্যের আশ্রমে শূন্যপথ দিয়ে গমন কর্তেছিলেম । অকস্মাৎ এই দেব-উপবনে এই তিনটি দেবনারীকে দেখে ইচ্ছা হলো যে যেমন করে পারি এদের মধ্যে কোন কলহ উপস্থিত করাই—এই জন্যেই আমি এই পর্ত্ত সানুতে অবতীর্ণ হইয়াছি । তা আমার এ মন-কামনাটি কি সুযোগে সুসিদ্ধ করি ? ( চিন্তা করিয়া ) হাঁ, হয়েছে । এই যে স্তবর্ণ পদ্মটি আমি মানস সরোবর থেকে অর্পচয়ন করে এনেছি, এর দ্বারাই আমার কার্য সফল হবে । ( অগ্রসর হইয়া ) আপনাদের কল্যাণ হউক !

সকলে । দেবর্ষি, আমরা সকলে আপনাকে অভিবাদন করি । ( প্রণাম । )

শচী । ( স্বগত ) এ হতভাগা ত সর্বত্রই বিবাদের মূল, তা এ আবার কোত্থেকে এখানে এসে উপস্থিত হলো ?—ও মা ! আমি এ কি কচ্চি ? ও যে অন্তর্যামী ! ও আমার এ সকল মনের কথা টের পেলে কি আর রক্ষা আছে । ( প্রকাশে ) ভগবন্, আজ আমাদের কি শুভ দিন ! আমরা আপনার ত্রিচরণ দর্শন করে চরিতার্থ হইলাম । তবে আপনার কোথায় গমন হচে ?

নার । ( স্বগত ) এ দুইটা স্ত্রীটার কি কিছুমাত্র লজ্জা নাই । এ কি ? এর যে উদরে বিষ, মুখে মধু । এ যে মাকালফল । বর্ণ দেখলে চক্ষুঃ শীতল হয়, কিন্তু গভিতরে—ভস্ম ! তা আমার যে পর্য্যন্ত সাধ্য থাকে একে যথোচিত দণ্ড না দিয়ে এ স্থান হতে কোনমতেই প্রস্থান করা হবে না । ( প্রকাশে ) আপনাদের চন্দ্রানন দর্শন করায় আমি পরমসুখী হইলাম ।

আমার কথা জ্ঞান কেন জিজ্ঞাসা করেন ? আমি এক ষোল্লভের  
বিপদে পড়ে এই ত্রিভুবন পর্য্যটন করে বেড়াচ্ছি ।

রতি । বলেন কি ?

নার । আর বলবো কি ? কয়েক দিন হলো আমি কৈলাশ  
পুরীতে হরগৌরী দর্শন করে আপন আশ্রমে প্রত্যাগমন  
কচ্ছিলেম, এমন সময়ে দৈবমায়ার তৃষ্ণাতুর হয়ে মানস সরো-  
বরের নিকট উপস্থিত হলেম—

শচী । তার পর, মহাশয় ?

নার । সরোবর তীরে উপস্থিত হয়ে দেখলেম যে তার  
সলিলে একটি কনকপদ্ম ফুটে রয়েছে ।

রতি । দেবর্ষি, তার পর কি হলো ?

নার । আমি পদ্মটির সৌন্দর্য্য দেখে তৃষ্ণা পীড়া বিস্মৃত  
হয়ে অতি যত্ন করে তুললেম ।

সকলে । তার পর ? তার পর ?

নার । তৎক্ষণাৎ আকাশমার্গে এই দৈববাণী হলো—“হে  
নারদ, এ ভগবতী পার্বতীর পদ্ম ; একে অবচয়ন করা তোমার  
উচিত কর্ম্ম হয় নাই । এক্ষণে এ ত্রিভুবন মধ্যে যে নারী সর্বা-  
পেক্ষা পরমসুন্দরী তাকে এ পুষ্প না দিলে তুমি গিরিজার  
ক্রোধানলে দগ্ধ হবে।”—হায় ! এ কি সামান্য বিপদ !—

শচী । (সহাস্র বদনে) ভগবানু, আপনি এ বিষয়ে আর  
উদ্বিগ্ন হবেন না । আপনি এ পদ্মটি আমাকেই প্রদান করুন  
না কেন ?

মুর । কেন, তোমাকে প্রদান করবেন কেন ? দেবর্ষি,  
আপনি এ পদ্মটি আমাকে দিউন ।

রতি । মুনিবর, আপনিই বিবেচনা করুন । এ দেবনির্ধিত



কনকপদ্মের উপযুক্ত পাত্রী আমাপেক্ষা ত্রিভুবনে আর কে আছে ?

নার । ( স্বগত ) . এইত আমার মনস্কামনা সিদ্ধ হলো । তা এ ঝড় আরম্ভের আগেই আমার এখান থেকে প্রস্থান করা শ্রেয়ঃ । ( প্রকাশে ) আপনাদের এ বিষয়ে আমাকে অনুরোধ করা উচিত হয় না । দেখুন, আমি বুদ্ধ, বনচারী তপস্বী, আপনারা সকলেই দেবনারী । আপনাদের মধ্যে যে কে সর্কাপেক্ষা সুন্দরী, এ কথার নির্ঘণ্ট করা আমার সাধ্য নয় । অতএব আমি এই কনকপদ্ম এই ভগবান্ বিষ্ণ্বাচলের শৃঙ্গের উপর রাখ্লেম্,—আপনাদের মধ্যে যিনি পরমসুন্দরী, তিনি ব্যতীত আর কেউ এ পুষ্প স্পর্শ করবামাত্রই তাঁকে পাষণ মুর্তি ধর্যে এই উপবনে সহস্র বৎসর থাকতে হবে । আমি এক্ষণে বিদায় হলেম্ ।

[ প্রস্থান ।

শচী । ( ঈষৎ কোপে ) তোমাদের মতন বেহায়্যা স্ত্রী কি আর আছে ?

উভয়ে । কেন ? বেহায়্যা আবার কিসে দেখ্লে ?

শচী । কেন, তা আবার জিজ্ঞাসা কর ? তোমাদের অহঙ্কার দেখ্লে ভয় হয় । আই মা ! কি লজ্জার কথা ! তোমাদের কি আমার কাছে এত দর্প করা সাজে ?

উভয়ে । কেন, কেন ? আমরা কি দর্প করেছি ?

শচী । তোমরা কি জান না যে আমি ইন্দ্রের ইন্দ্রাণী ।

মুর । ইঃ, তা হলেই বা । তুমি কি জান না যে আমি ষকেশ্বরের প্রণয়িনী মুরজা ।

রতি । তোমাদের কথা শুনে হাসি পায় । তোমরা কি ভুলে যে, যে অনঙ্গদেব সমস্ত জগতের মনঃ মোহন করেন, আমি তাঁর মনোমোহিনী রতি ।

শচী । আঃ, তোমার মন্থথের কথা আর কইও না । হরের কোপানলে দধি হওয়া অবধি তাঁর আর কি আছে ?

রতি । কেন, 'কি না আছে ? তুমি যদি আমাকে আমার মন্থথের কথা কইতে বারণ কর, তবে তুমিও তোমার ইন্দ্রের নাম আর মুখে শুনো না । তোমার প্রতি যে সুরপতির কত অনুরাগ তা সকলেই জানে । তা তোমার প্রতি এত অনুরাগ না থাকলে কি তিনি আর সহস্রলোকন হতেন ?

শচী । ( সরোষে ) তোর এত বড় যোগ্যতা ? তুই সুরে-  
ন্দ্রের নিন্দা করিস্ ! তোর মুখ দেখলে পাপ হয় ।

( অদৃশ্যভাবে নারদের পুনঃপ্রবেশ । )

নার । ( স্বগত ) আহা ! কি কন্দলই বাধিয়েছি । ইচ্ছা করে যে বীণাধ্বনি করে একবার আক্লাদে হাত তুলে নৃত্য করি । ( চিন্তা করিয়া ) যা হউক, এ দুর্জয় কোপাগ্নি এখন নির্বাণ করা উচিত ।

[ প্রস্থান ।

মুর । আঃ, মিছে ঝগড়া স্কর কেন ?

আকাশে । হে দেবনন্দ্রীগণ ! তোমরা কেন এ বৃথা বিবাদ করে দেবসমাজে নিন্দনীয় হবে ? দেখ, ঐ উৎসের সমীপে শিলাতলে বিদর্ভনগরের রাজা ইন্দ্রনীল রায় সুপ্তভাবে আছেন । তোমরা এ বিষয়ে ওঁকে মধ্যস্থ মান ।

মুর । ঐ শুনলে ত ? আর যন্দে কাজ কি ? এস, রাজা ইন্দ্রনীল রায়কে জাগান যাক্ গে ।

শচী । রাজা ইন্দ্রনীল আমার মায়ায় নিদ্রাবৃত হয়ে রয়েছে । এস, আমরা ঐ শিখরের কাছে দাঁড়িয়ে মহারাজকে মায়াজাল হতে মুক্ত করি ।

[ সকলের প্রস্থান, আকাশে কোমল বাদ্য ।

রাজা । ( গাত্ৰোত্থান করিয়া স্বগত ) আহা ! কি চমৎকার স্বপ্নটাই দেখতেছিলেম । ( দীর্ঘনিশ্বাস পরিত্যাগ করিয়া ) হে নিদ্রাদেবি, আমি কি অপরাধ করেছি যে তুমি এ সময়ে আমার প্রতি এত প্রতিকূল হল্যে ? হায় ! আমি সশরীরে স্বর্গভোগ কত্যা আরম্ভ করবামাত্রই তুমি আমাকে আবার এ দুর্জয় সংসারজালে টেনে এনে ফেললে ? জননি, এ কি মায়ের ধর্ম !—আহা ! কি চমৎকার স্বপ্নটাই দেখেছিলেম ! বোধ হলো যেন আমি দেবসভায় বসে অপ্সরীগণের মনোহর সঙ্গীত শ্রবণ কর্তেছিলাম, আর চতুর্দিক থেকে যে কত সৌরভসুধা বৃষ্টি হতেছিল, তা বর্ণনা করা মনুষ্যের অসাধ্য কর্ম । ( সচকিতে ) এ আবার কি ? এঁরা সকল কে ? দেবী কি মানবী ?

( শচী, মুরজা এবং রতির পুনঃ প্রবেশ । )

তা এঁদের অনিমেম চক্ষু আর ছায়াহীন দেহ এঁদের দেবত্ব সন্দেহ দূর না কল্যেও, এঁদের অপরূপ রূপ লাভণ্যে আমার সে সংশয় ভঞ্জন হতো । নলিনীর আত্মা পোলে অন্ধব্যক্তিও জ্ঞান্তে পারে যে নলিনীই তার নিকট কুটে রয়েছে । এমন অপরূপ রূপ লাভণ্য কি ভ্রমণে সম্ভবে ?

শচী । মহারাজের জয় হউক্ ।

মুর । মহারাজ দীর্ঘায়ুঃ হউন ।

রতি । মহারাজের সর্ব্বত্র মঙ্গল হউক্ ।

শচী । হে মহীপতে, আমি ইচ্ছানী শচী ।

মুর । মহারাজ, আমি যক্ষরাজপত্নী মুরজা ।

রতি । নরেশ্বর, আমি মন্থপ্রাণয়িনী রতি ।

শচী । ( জনান্তিকে মুরজা এবং রতির প্রতি ) এক জনকে কথা কহিতে দাও—এত গোল কর কেন ? এমন কল্যে কি কর্ম্ম সিদ্ধ হবে ?

রাজা । ( প্রণাম করিয়া ) আপনাদের স্ত্রীচরণ দর্শন করে আমার জন্ম সার্থক হলো । তা আপনারা এ দাসের প্রতি কি আশ্রা করেন ?

শচী । মহারাজ, ঐ যে পর্কতশব্দের উপর কনকপদ্মটি দেখিতে পাচোন, ঐটি আমাদের তিন জনের মধ্যে আপনি যাকে সর্কাপেক্ষা পরমসুন্দরী বিবেচনা করেন, তাকেই প্রদান করুন ।

রতি । মহারাজ, শচীদেবী যা বল্লেন, আপনি তা ভাল করে বুঝলেন ত ?—যে সর্কাপেক্ষা পরমসুন্দরী—

শচী । আরে এত গোল কর কেন ?

রাজা । ( স্বগত ) এ কি বিষম বিভ্রাট ! এঁরা সকলেই ত দেবনারী দেখছি, তা এঁদের মধ্যে কাকে তুষ্ট কাকেই বা কষ্ট করবো । ( প্রকাশ ) আপনারা এ বিষয়ে এ দাসকে মার্জ্জনা করুন ।

শচী । তা কখনই হবে না । আপনি পৃথিবীতে ধর্ম্ম অবতার । আপনাকে অবশ্যই এ বিচার কতে্য হবে ।

মুর। এ মীমাংসা আপনি না কল্যে আর কে করবে ?

রতি। তা এতে আপনার ভয় কি ? আপনি একবার আমাদের দিকে চেয়ে দেখলেই তা হয়।

রাজা। ( স্বগত ) কি সৰ্কনাশ ! আজ্ যে আমি কি কুলগ্নেই যাত্রা করেছিল্যে তা আর কাকে বলবো।

শচী। নরনাথ, আপনি যে চুপ করে রইলেন। এ বিষয়ে কি আপনার মনে কোন সংশয় হয় ? দেখুন, আমি সুরেন্দ্রের মহিষী, আমি ইচ্ছা কল্যে আপনাকে এই মুহূর্তেই সমাগরা পৃথিবীর ইন্দ্রত্বপদে নিযুক্ত কৃত্যে পারি।

মুর। শচীদেবি, এ সখি, তোমার বৃথা গৰ্ব্ব। দেখ, তোমরা প্রবল দৈত্যকুলের ভয়ে অমরাবতীতে দিবা রাত্রি যেন মরে থাক। তা তুমি আবার সমাগরা পৃথিবীর ইন্দ্রত্ব কোত্ থেকে দেবে গা ? ( রাজার প্রতি ) হে নরেশ্বর, আপনি বিবেচনা করুন, আমি ধনেশ্বরের ধর্মপত্নী ; এ বসুমতী আমারই রত্নাগার,—এতে যত অমূল্য রত্নরাজি আছে, আমি সে সকলের অধিকারিণী।

রতি। ( স্বগত ) বাঃ, এঁরা যে দুইজনেই দেখ্টি বিচার-কর্তাকে ঘুস খাওয়াতে উচ্চত হলেন, তবে আমি আর চুপ করে থাকি কেন ? ( প্রকাশে ) মহারাজ, ইন্দ্রত্বপদের যে কি সুখ তা সুরপতিই জানেন। পক্ষিরাজ বাজ সদর্পে উন্নত পর্কতশৃঙ্গে বাস করে বটে ; কিন্তু ঝড় আরম্ভ হলে সকলের আগে তারই সৰ্কনাশ হয়। আর ধনের কথা কি বলবো ? যে ফণীর মস্তকে মণি জগ্নে, সে সৰ্কদাই বিবরে লুক্য়ে থাকে। আর যদি কখন ক্ষুধাতুর হয়ে ঘোরতর অন্ধকার রাত্রেও বাইরে আসে, তবে তার মণির কান্তি দেখে কে তার প্রাণ

মুঠ কতো চেফা না করে ? আরও দেখুন, ধন-উপার্জনে যার মন, তার অবশেষে ভুত্‌পোকায় দশা ঘটে ! এই নির্বোধ কীট অনেক পরিশ্রমে একখানি উত্তম গৃহ নির্মাণ করে, তার মধ্যে বদ্ধ হয়ে, ক্ষুধাতৃষ্ণায় প্রাণ হারায়, পরে পুঁট বন্ধ অন্য লোকে পরে ।

শচী । আহা !. রতিদেবীর কি স্মরণ বুদ্ধি গা ! তবে এ পৃথিবীতে সুখী কে ?

রতি । তা তুমি কেমন করে জানবে ? আমার বিবেচনায় মধুকর সর্কাপেক্ষা সুখী । পুষ্পকুলের মধুপান ভিন্ন তার আর কোন কর্মই নাই । তা মহারাজ, এ পৃথিবীতে যত পুষ্পস্বরূপ অঙ্গনা বিকশিতা হয়, তারা সকলেই আমার সেবিকা ।

রাজা । ( স্বগত ) এখন আমার কি করণ কর্তব্য ? এ বিপদ হতে কিসে পরিত্রাণ পাই ?

শচী । হে নরনাথ, আপনার আর এ বিষয়ে বিলম্ব করা উচিত হয় না ।

রাজা । যে আজ্ঞা । ( কনকপদ্ম গ্রহণ করিয়া ) আপনারা স্বেচ্ছাক্রমে আমাকে এ বিষয়ে মধ্যস্থ মেনেছেন, তা এতে আমার বিবেচনায় যা যথার্থ বোধ হয়, আমি তা কল্যে ত আপনাদের মধ্যে কেউ আমার প্রতি বিরক্ত হবেন না ?

সকলে । তা কেন হবো ?

রাজা । তবে আমি এ কনকপদ্ম রতিদেবীকে প্রদান করি । আমার বিবেচনায় মন্থমনোমোহিনী রতিদেবীই বামাদল্লের ঈশ্বরী । ( রতিকে পদ্ম প্রদান । )

শচী । ( সরোষে ) রে ছুঁট মানব, তই কামের বশ হয়ে

ধর্ম নষ্ট করলি? তা তোকে আমি এ নিমিত্তে যথোচিত দণ্ড দিতে কোন মতেই ক্রটি করবো না ।

[ প্রস্থান ।

মুর ! ( সরোষে ) তুই রাজকূলে জন্মগ্রহণ করো, স্ত্রী-লোভে চণ্ডালের কর্ম করলি? তা তুই যে কালক্রমে এর সমুচিত শাস্তি পাবি, তার কোন সংশয় নাই ।

[ প্রস্থান ।

রতি ! ( প্রফুল্ল বদনে ) মহারাজ, আপনি এ বিষয়ে কোনমতেই শঙ্কিত হবেন না । আমি আপনাকে রক্ষা করবো, আর আপনার যথাবিধি পুরস্কার কত্যাও ভুলবো না । আপনি আমার আশীর্ব্বাদে পরম সুখভোগী হবেন । এখন আমি বিদায় হই ।

[ প্রস্থান ।

রাজা ! ( স্বগত ) বিধাতার নিরীক্স কে খণ্ডন কত্যা পারবে? তা পরে আমার অদৃষ্টে যা থাকে তাই হবে; এখন যে এ ঝঞ্ঝট্টা মিটে গেল, এতেই বাঁচল্যোম্ । শচী আর মুরজা যে আমাকে ক্রোধানলে ভস্ম করো যাগ নাই, এই আমার পরম লাভ ।

( সারথির প্রবেশ । )

সার । মহারাজের জয় হউক । দেব, আপনার বথ প্রস্তুত ।

রাজা । সে কি? তুমি এ পর্ব্বত প্রদেশে রথ কি প্রকারে আনলে ?

সার । ( কৃতজ্ঞলিপুটে ) মহারাজ, আপনার প্রমাদে এ দাসের পক্ষে এ অতি সামান্য কর্ম ।

রাজা । তা রথ এখানে এনে ভালই করেছ' । আমি এই ভগবান্ বিদ্যাচলের মতন্ প্রায় অচল হয়ে পড়েছি । আর্ষ্য মানবক কোথায় ?

সার । আজ্ঞা—তিনি মহারাজের অন্বেষণে ইতস্ততঃ ভ্রমণ করে বেড়াচেন ।

নেপথ্যে । ও—হো !—হৈ !—হৈ !

রাজা । সারথি, তুমি রথের নিকটে গিয়ে আমার অপেক্ষা কর । আমি মানবককে সন্ধে করে আনি ।

সার । যে আজ্ঞা, মহারাজ ।

[ প্রস্থান ।

রাজা । ( স্বগত ) দেখি মানবক এখানে একলা এসে কি করে । এমন নিভৃত স্থলে ওর মতন্ ভীক মনুষ্যকে ভয় দেখান অতি সহজ কর্ম । ( পরীতাস্তরালে অবস্থিতি । )

( বিদুষকের প্রবেশ । )

বিদু । ( স্বগত ) দূর কর মেনে ! এ কি সামান্য যন্ত্রণা । ওরে নিষ্ঠুর পেট, তুই এ অনর্থের মূল । আমি যে এই হাবাতে রাজাটার পাছে পাছে ওর ছায়ার মতন ফিরে বেড়াই, সে কেবল তোর জ্বালায় বৈ ত নয় । এই দেখ, এই পাহাড়ে দেশে হেঁটে হেঁটে আমি খোঁড়া হয়ে গেলেম্ । ( ভূতলে উপবেশন করিয়া ) হায়, এই যে ব্রাহ্মণের পাদপদ্ম, এর চিহ্ন স্বয়ং পুঙ্খশোভম কত প্রযত্নে আপনার বক্ষঃস্থলে ধারণ করেন । তা দেখ, এ পাথরের চোটে একেবারে যেন ছিঁড়ে গেছে ।



উঃ, একবার রক্তের স্রোতের দিকে চেয়ে দেখ, যেন প্রবালের  
বৃষ্টিই হচ্ছে । রে দুর্ঘট বিদ্যাচল, তোর কি দয়ার লেশমাত্রও  
নাই । আর কোত্থেকেই বা থাকবে । তোর শরীর যেমন  
পাষণ, তোর হৃদয়ও তেমনি কঠিন । ওরে অধম, তোর কি  
ব্রহ্মহত্যা পাপের ভয় নাই ?

নেপথ্যে । ( তর্জ্জন গর্জ্জন শব্দ । )

বিদু । ও বাবা ! এ আবার কি ? পর্কত টা রেগে উঠলো  
না কি ?

নেপথ্যে । ( তর্জ্জন গর্জ্জন শব্দ । )

বিদু । ( সক্রোশে ) কি সর্কনাশ ! ( ভুতলে জানুদ্বয়  
নিঃক্ষেপ করিয়া প্রকাশে ) হে ভগবন্ বিদ্যাচল, তুমি আমার  
দোষ এবার ক্ষমা কর । প্রভু, আমি তোমার পায়ে পড়ি ।  
আমি এই নাক কান মলে বলছি, আমি তোমাকে আর এ  
জন্মেও নিন্দা করবো না । হিমাঙ্গিকে অচলেত্র কে বলে ?  
তুমিই পর্কতকুলের শিরোমণি । ( গাত্রোথান এবং চিন্তা  
করিয়া স্বগত ) দূর, আমার আজ্ কি হয়েছে । আমি এক  
টুতে এত ডরালেম যে ? বোধ করি, ও শব্দটা কেবল  
প্রতিধ্বনি মাত্র ।

নেপথ্যে ।——ধ্বনিমাত্র ।

বিদু । ( সচকিতে ) এ আবার কি ? এ যে ষথার্থই প্রতি-  
ধ্বনি । তা পর্কত-প্রদেশই ত প্রতিধ্বনির জন্মস্থান ।  
দেখি এর সঙ্গে কেন কিঞ্চিৎ আলাপই করি না । ( উচ্চস্বরে )  
ওলো প্রতিধ্বনি ।

নেপথ্যে ।—পিরীতের ধনী ।

বিদু । ওলো তুই আবার কোত্থেকে লো ?

নেপথ্যে ।—— কে লো ?

বিদু । তুই লো ।

নেপথ্যে ।—তুই লো ।

বিদু । মর, তোর মুখে ছাই ।

নেপথ্যে ।—মুখে ছাই ।

বিদু । কার মুখে লো ? আমার মুখে কি তোর মুখে ?

নেপথ্যে ।—তোর মুখে ।

বিদু । বাহবা ! বাহবা ।

নেপথ্যে ।—বোবা ।

বিদু । মর গস্তানি, তুই আমাকে গাল দিস্ ।

নেপথ্যে ।—ইস্ ।

বিদু ।—যা, এখন যা ।

নেপথ্যে ।—আঃ ।

বিদু । ও কি লো ? তোর কি আমাকে ছেড়ে যেতে মন  
চায় না লো ।

নেপথ্যে ।—না লো ।

বিদু । দূর মাগি, তুই এখন গেলে বাঁচি ।

নেপথ্যে ।—অ্যা—ছি ।

বিদু । মাগীকে তাড়াবার কোন উপায়ই দেখি না ।

নেপথ্যে ।—না ।

বিদু । বটে ? তবে এই দেখ্ । ( মুখাবৃত করিয়া শিলা-  
তলে উপবেশন । )

( রাজার পুনঃ প্রবেশ । )

রাজা । ( স্বগত ) আমাকে যে আজ্ কত বেশ ধরতে  
হচে তা বলা ছুফর । আমি এই উপবনে নিবাদরূপে প্রবেশ

করে, প্রথমতঃ দেব দেবীর মধ্যস্থ হলেম্ ; তার পরে আবার প্রতিধ্বনিও হলেম্ ; দেখি, আরও কি হতে হয় । ( পার্শ্বতাস্তুরালে অবস্থিতি । )

বিদূ । ( মুখ মোচন করিয়া স্বগত ) মাগি গেছে ত । ওলো প্রতিধ্বনি, তুই কোথায় লো । রাম বলো, আপদ গেছে । ( চতুর্দিক অবলোকন করিয়া ) আহা ! ফোয়ারাটী কি সুন্দর দেখ ! এমন জল দেখলে শীতকালেও তৃষ্ণা পায় । তা আমার যে এক দৃঢ় প্রতিজ্ঞা আছে যে কিছু আহার না করে কখনই জল খাব না । কি আশ্চর্য্য ! ঐ যে একটা উত্তম পাকা দাড়িম্ দেখতে পাচ্ছি । তা এ নির্জর্জন স্থানে একজন সদ্বংশজাত ব্রাহ্মণকে কিছু ফলাহারই করাইনে কেন ? ( দাড়িম্ব গ্রহণ । )

নেপথ্যে । রে দুষ্কৃত তস্কর, তুই কি জানিস্না যে এ দেব-উপবন যক্ষরাজের রক্ষিত ।

বিদূ । ( সত্রাসে স্বগত ) ও বাবা ! এ আবার মাটী খেয়ে কি করে বস্লেম্ ।

নেপথ্যে । ওরে পাষাণ, আমি এই তোমর মস্তকচ্ছেদন কভ্যে আস্ছি । ( ছুঙ্কার ধ্বনি । )

বিদূ । ( সত্রাসে ভূতলে জানুদ্বয় নিক্ষেপ করিয়া প্রকাশে ) হে যক্ষরাজ, আপনি এবার আমাকে রক্ষা করুন । আমি এক জন অতি দরিদ্র ব্রাহ্মণ, পেটের দায়েই এ কর্মটা করেছি ;

নেপথ্যে । হা মিথ্যাবাদিন্, যার ব্রাহ্মণকুলে জন্ম সে মহাত্মা কি কখন পরধন অপহরণ করে ?

বিদূ । ( সত্রাসে ) হে যক্ষরাজ, আমি আপনার মাথা খাই যদি মিথ্যা কথা কই । আমি যথার্থই ব্রাহ্মণ । তা

আমি আপনার নিকটে এই শপথ কচি যে, যদি আর কখন পরের দ্রব্য চুরি করি, তবে যেন আমি সাতপুষ্করের হাড় খাই । আমি এই নাকে খত দিয়ে বল্চি—

নেপথ্যে । দে, খত দে ।

বিদু । ( খত দিয়া ) আর কি কতো আজ্ঞা করেন বলুন ।

নেপথ্যে । তুই এ স্থলে কি নিমিত্তে এসেছিলি ?

বিদু । ( স্বগত ) বাঁচলেম্ ! আর যে কত ফল চুরি করে খেয়েছি, তা জিজ্ঞাসা কল্যে না । ( প্রকাশে ) বক্ষরাজ, আর দুঃখের কথা কি বলবো । আমি বিদর্ভনগরের রাজর্ন ইন্দ্রনীলের সঙ্গে আপনার উপবনে এসেছি ।

নেপথ্যে । সে কি ? বিদর্ভনগরের ইন্দ্রনীল রায় যে অতি নিষ্ঠুর ব্যক্তি । সে না তার প্রজাদের অত্যন্ত পীড়ন করে ?

বিদু । আপনি দেখছি সকলই জানেন, তা আপনাকে আমি আর অধিক কি বলবো । রাজা বেটা রেয়েতের কাছে যখন যা দেখে, তখনই তাই লুটে পুটে ন্যায় ।

নেপথ্যে । বটে ? সে না বড় অসৎ ?

বিদু । মহাশয়, ও কথা আর বলবেন না,—ওর রাজ্যে বাস করা ভার । বেটা রাবণের পিতামহ ।

নেপথ্যে । বটে ? রাজার কয় সংসার ?

বিদু । আজ্ঞা, বেটা এখনও বিয়ে করে নি ।

নেপথ্যে । কেন ?

বিদু । মহাশয়, বেটা রূপণের শেষ । পয়সা খরচ হবে বল্যে বিয়ে করে না ।

( রাজার পুনঃ প্রবেশ । )

রাজা । কি হে দ্বিজবর, এ সকল কি সত্য কথা ? আমি

কি প্রজ্ঞাপীড়ন করি? আমি কি দশানন অপেক্ষাও ভূরাচার?  
আমি কি অর্থ ব্যয় হবে বল্যে বিবাহ করি না?

বিদূ। (স্বগত) কি সর্বনাশ! এত যক্ষরাজ নয়, এ যে  
রাজা ইন্দ্রনীল! তা' এখন কি করি? একে যে গালাগালি  
দিছি, বোধ করি, মেরে হাড় ভেঙ্গে দেবে এখন।

রাজা। কি হে সখে মানবক, তুমি যে চুপ করে রইলে?  
এখন আমার উচিত যে আমিই তোমার মস্তকচ্ছেদ করি।

বিদূ। হাঃ! হাঃ! হাঃ! (উচ্চহাস্য।)

রাজা। ও কি ও, হেসে উড়িয়ে দিতে চাও না কি?

বিদূ। হাঃ! হাঃ! হাঃ! (উচ্চহাস্য।)

রাজা। মর মুখ। তুই পাগল হলি না কি?

বিদূ। হাঃ! হাঃ! হাঃ! বয়স্য, আপনি কি বিবেচনা  
করেন যে আমি আপনাকে চিন্তে পেরেছিলেম না। হাঃ!  
হাঃ! হাঃ!

রাজা। বল দেখি, কিসে চিন্তে পেরেছিলি?

বিদূ। মহারাজ, হাতির গর্জ্জন শুনে কি কেউ মনে করে  
যে কোলা ব্যাঙ ডাক্চে। সিংহের ছুঙ্কার শব্দ কি গলাভাঙ্গা  
গাধার চীৎকার বোধ হয়। হাঃ! হাঃ! হাঃ! (উচ্চহাস্য।)

রাজা। ভাল, তবে তুমি আমাকে এত নিন্দা কল্যে  
কেন?

বিদূ। বয়স্য, পাপকর্ম কল্যে তার ফল এ জন্মেও ভোগ  
কতো হয়। দেখুন, আপনি এক জন সদ্ভ্রাতৃগণকে ভয় দেখি-  
য়ে তাকে কষ্ট দিতে উদ্যত হয়েছিলেন, তার জন্যেই আপ-  
নাকে নিন্দাস্বরূপ কিঞ্চিৎ তিজ্ঞ বারি পান কতো হলো।

রাজা। (সহাস্যবদনে) সখে, তোমার কি অগাধ বুদ্ধি।

সে যা হউক, আমি যে আজ এ উপবনে কত অভ্যুত ব্যাপার দেখেছি, তা তুমি শুনলে অবাক হবে ।

বিদু । কেন মহারাজ ? কি হয়েছিল, বলুন দেখি ?

রাজা । সে সকল কথা এস্থলে বক্তব্য নয় । চল, এখন দেশে যাই । সে সব কথা এর পরে বলবো ।

বিদু । তবে চলুন । ( কিস্কিং পরিক্রমণ করিয়া অবস্থিতি । )

রাজা । ও আবার কি ? দাঁড়ালে কেন ?

বিদু । বয়স্ক, ভাব্চি কি—বলি যদি এখানে যক্ষরাজ্য নাই, তবে ও পাকা দাড়িমটা ফেলে যাব কেন ?

রাজা । ( সহাস্রবদনে ) কে ফেলে যেতে বল্চে ? নাও না কেন ?

বিদু । যে আজ্ঞা । ( দাড়িম গ্রহণ । )

রাজা । চল, এখন যাই । যদি যক্ষরাজ যথার্থই এসে উপস্থিত হন, তবে কি হবে ?

বিদু । আজ্ঞা হাঁ—এ বড় মন্দ কথা নয় ; তবে শীঘ্রই চলুন ।

[ উভয়ের প্রস্থান ।

ইতি প্রথমাক্ষ ।

## দ্বিতীয় অঙ্ক ।



### প্রথম গর্ভাঙ্ক ।



মাহেশ্বরীপুরী—রাজশুভাসংক্রান্ত—উদ্যান ।

( পদ্মাবতী এবং সখীর প্রবেশ । )

পদ্মা । ( আকাশে দৃষ্টিপাত করিয়া ) সখি, সূর্য্যদেব অস্তে  
গেছেন বটে, কিন্তু এখনও একটু রোদ্দ আছে ।

সখী । প্রিয়সখি, তবুও দেখ, ঐ না একটি তারা আকাশে  
উঠেছে ?

পদ্মা । ওঁকে কি তুমি চেন না, সখি ? ও যে ভগবতী  
রোহিণী । চন্দ্ৰের বিরহে ওঁর মন এত চঞ্চল হয়েছে, যে  
উনি লজ্জায় জলাঞ্জলি দিয়ে তাঁর আস্বার আগেই একলা  
এসে তাঁর অপেক্ষা কচেন ।

সখী । প্রিয়সখি, তা যেন হলো, কিন্তু একবার এ দিকে  
চেরে দেখ ! কি চমৎকার !

পদ্মা । কেন, কি হয়েছে ?

সখী । ঐ দেখ, মধুকর তোমার মালতীর মধুপান কতো  
এসেছে, কিন্তু মলয়মাকত যেন য়াগ করেই ওকে এক মুহূর্তের  
জন্যেও স্থির হয়ে বসতে দিচেন না । আর দেখ, ওরও  
কত লোভ । ওকে যতবার মলয় তাড়াচেন, ও ততবার  
ফিরে ফিরে এসে বসচে ।

পদ্মা । সখি, চল দেখিগে, চক্রবাকী তার প্রাণনাথকে  
বিদায় করে, এখন একলা কি কচে ।

সখী । প্রিয়সখি, তাতে কাজ নাই । বরঞ্চ চল দেখিগে, কুমুদিনী আজ্ কেমন বেশ করে তার বাসরঘরে চল্লের অপেক্ষা কচে ।

পদ্মা । সখি, যে ব্যক্তি সুখী, তার কাছে গেলেই বা কি, আর না গেলেই বা কি ? কিন্তু যে ব্যক্তি দুঃখী, তার কাছে গিয়ে দুটি মিষ্ট কথা কইলে তার মন অবশ্যই প্রফুল্ল হয় । আমি দেখেছি যে উচ্চস্থলে বৃক্ষিধারা পড়লে, জলটা অতি-শীঘ্র বেগে চল যায়, কিন্তু যদি কোন মরুভূমি কখন জল-ধরের প্রসাদ পায়, তবে সে তা তৎক্ষণাৎ ব্যগ্র হয়ে পাণ করণে ।

( পরিচারিকার প্রবেশ । )

পরি । রাজনন্দিনি, একজন পটোদের মেয়ে পট্ বেচবার জন্যে এসেছে; আপনি যদি আজ্ঞা করেন, তবে তাকে এখানে ডেকে আনি । সে বলছে যে, তার কাছে অনেক রকম উত্তম উত্তম পট আছে ।

সখী । দূর, এ কি পট দেখবার সময় ?

পদ্মা । কেন ? এখনও ত বড় অন্ধকার হয় নাই । ( পরিচারিকার প্রতি ) যা, তুই চিত্রকরীকে ডেকে আনুগে ।

পরি । রাজনন্দিনি, সে অতি নিকটেই আছে । ( উচ্চস্বরে ) ওলো পটোদের মেয়ে, আয়, তোকে রাজনন্দিনী ডাক্চেন !

নেপথ্যে । এই যাচি ।

( চিত্রকরীবেশে রতিদেবীর প্রবেশ । )

সখী । ( জনাস্তিকে পদ্মাবতীর প্রতি ) প্রিয়সখি, এর নীচকুলে জন্ম বটে, কিন্তু এর রূপলাবণ্য দেখলে চক্ষু জুড়ায় ।

পদ্মা । ( জনাস্তিকে সখীর প্রতি ) তুমি কি ভেবেচ, সখি,



যে মণি মাণিক্য কেবল রাজগৃহেই থাকে ? কতশত অন্ধকারময়  
খনিতেও যে তাদের পাওয়া যায় । এই যে উজ্জ্বল মুক্তাটি  
দেখ্চ, এ একটা কদাঙ্গার শুক্রির গর্ভে জন্মেছিল । আর যে  
নলিনীকে লোকে ফুলকুলের ঈশ্বরী বলে, তার কাদায় জন্ম ।  
( রতির প্রতি ) তুমি কি চাও ?

রতি । ( স্বগত ) আহা ! রাজা ইন্দ্রনীলের কি সৌভাগ্য ।  
তা সে শচী আর মুরজার দর্প চূর্ণ করে আমার যে মান  
রেখেছে, আমার তাকেই এই অমূল্য রত্নটি দান করা উচিত ।  
পদ্মা ! চিত্রকরি, তুমি যে চূর্ণ করে রৈলে ? তুমি ভয় করো  
না । এখানে কারু সাধ্য যে, তোমার প্রতি কোন অত্যাচার  
করে ।

রতি । আপনি হচেন্ রাজার মেয়ে, আপনার কাছে  
মুখ খুলতে আমার ভয় হয় ।

পদ্মা । ( সহাস্রবদনে ) কেন ? রাজকন্যারা কি রাক্ষসী ?  
তারাও তোমাদের মতন মানুষ বৈ ত নয় ।

রতি । ( স্বগত ) আহা ! মেয়েটি যেমন সুন্দরী তেমনই  
সরলা ।

পদ্মা । ( শিলাতলে উপবেশন করিয়া ) চিত্রকরি, এই  
আমি বস্লেম, তোমার পট সকল এক এক খান করে দেখাও ।

রতি । যে আজ্ঞে, এই দেখাচ্চি ।

পদ্মা । চিত্রকরি, তুমি কোথায় থাক ?

রতি । আজ্ঞে, আমরা পাহাড়ে মানুষ ।

পদ্মা । তোমার স্বামী আছে ?

রতি । রাজনন্দিনি, আমার পোড়া স্বামীর কণা আর  
কেন জিজ্ঞাসা করেন ? তিনি আঙুনে পুড়েও মরেন্ না । আর

যেখানে সেখানে পান, কেবল লোকের মন মজিয়ে বেড়ান ।  
সখী । প্রিয়সখি, যদি তোমার পট দেখতে ইচ্ছা থাকে  
তবে আর দেরি করো না ।

পদ্মা । চিত্রকরি, এস, তোমার পট দেখাও ।

রতি । এই দেখুন । ( একখান পট প্রদান )

পদ্মা । ( অবলোকন করিয়া সখীর প্রতি ) সখি, এই দেখ,  
অশোককাননে সীতাদেবী রাক্ষসীদের মধ্যে বসে কাঁদছেন ।  
আহা ! যেন সৌদামিনী মেঘমালায় বেষ্টিত হয়ে রয়েছে ।  
কিষ্কা নলিনীকে যেন শৈবালকুল ঘেরে বসেছে । আর ঐ যে  
ক্ষুদ্র বানরটি গাছের ডালে দেখচ, ও পবনপুঞ্জ হনুমান । দেখ,  
জানকীর দশা দেখে ওর চক্ষের জল বৃষ্টিধারার মতন অনর্গল  
পড়ছে । সখি, এ সকল ত্রেতাযুগের কথা, তবু এখনও মনে  
হলো হৃদয় বিদীর্ণ হয় ।

রতি । ( স্বগত ) আহা ! এ কি সামান্য দয়াশীলা । ভগবতী  
বৈদেহীর দুঃখেও এর নয়ন অশ্রুজলে পরিপূর্ণ হলো ।  
( প্রকাশে ) রাজনন্দিনি, আরও দেখুন । ( অন্য একখান পট  
প্রদান । )

পদ্মা । এ দ্রোপদীর স্বয়ম্বর । এই যে ব্রাহ্মণ-ধনুর্বাণ ধরে  
অলক্ষ্য লক্ষ্যের দিকে আকাশ মার্গে দৃষ্টি কচেন ইনি যথার্থ  
ব্রাহ্মণ নন । ইনি ছদ্মবেশী ধনঞ্জয় । ঐ যাজ্ঞসেনী ।

রতি । ( পদ্মাবতীর প্রতি ) রাজনন্দিনি, এই পটখান  
একবার দেখুন দেখি । ( পট প্রদান । )

পদ্মা । ( অবলোকন করিয়া ব্যগ্রভাবে রতির প্রতি ) চিত্র-  
করি, ও কার প্রতিমূর্তি লা ?

রতি । আজ্ঞে, তা আমি আপনাকে———( অর্ধোক্তি ) ।

পদ্মা । সখি——(মুচ্ছা প্রাপ্তি ।)

সখী । ( পদ্মাবতীকে ক্রোড়ে ধারণ করিয়া ) হায়, একি !  
প্রিয়সখী যে ইঁঠাৎ অজ্ঞান হয়ে পড়লেন্ । ( পরিচারিকার  
প্রতি ) ওলো মাধবি, তুই শীঘ্র একটু জল আনত লা ।

[ পরিচারিকার বেগে প্রস্থান ।

রতি । ( স্বগত ) ইন্দ্রনীলের প্রতি যে পদ্মাবতীর এত  
পূর্করাগ জন্মেছে, তা ত আমি জান্তেম না । এদের দুজনকে  
স্বপ্নযোগে কয়েক বার একত্র করাতেই এরা উভয়ে উভয়ের  
প্রতি এত অনুরক্ত হয়েছে । এত ভালই হয়েছে । আমার  
আর এখন এখানে থাকায় কোন প্রয়োজন নাই । শচী আর  
মুরজার ক্রোধে পদ্মাবতীর কি অনিষ্ট ঘটতে পারবে ? আমি  
এ সকল বৃত্তান্ত ভগবতী পার্শ্বতীকে অবগত করালে, তিনি  
যে এই পদ্মাবতীর প্রতি অনুকুল হবেন্ তার কোন সন্দেহ  
নাই । ( অন্তর্দ্বান । )

সখী । ( স্বগত ) হায় ! প্রিয়সখী যে সহসা অচেতন হয়ে  
পড়লেন্ এর কারণ কি ?

পদ্মা । ( গাত্রোত্থান করিয়া ব্যগ্রভাবে ) সখি, চিত্রকরী  
কোথায় গেল ?

সখী । কৈ, তাকে ত দেখতে পাই না । বোধ করি, সে  
তোমাকে অচেতন দেখে মাধবীর সঙ্গে জল আনতে গিয়ে  
থাক্বে ।

পদ্মা । ( ব্যগ্রভাবে ) তবে কি সে চিত্রপটখানা সঙ্গে  
লয়ে গেছে ?

সখী । ঐ যে চিত্রপট তোমার সম্মুখেই পড়ে রয়েছে ।

পদ্মা । ( ব্যগ্রভাবে চিত্রপট লইয়া বক্ষঃস্থলে স্থাপন করিয়া ) সখি, এ চিত্রকরীকে তুমি আর কখন দেখেচ ?

সখী । প্রিয়সখি, তুমি যে চিত্রপটখানা এত যত্ন করে বুকে লুকিয়ে রাখলে ?

পদ্মা । আমি যা জিজ্ঞাসা করি, তার উত্তর দাও না কেন ? বলি, এ চিত্রকরীকে তুমি আর কখন দেখেচ ?

সখী । ওকে আমি কোথায় দেখবো ?

( জল লইয়া পরিচারিকার পুনঃপ্রবেশ । )

পরি । রাজনন্দিনী যে আমি জল না আনতে আনতেই সেরে উঠেছেন, তা বেশ হয়েছে ।

সখী । হ্যাঁ লা মাধবি, এ পটো মাগী কোন্ দিকে গেল তুই দেখেচিস ?

পরি । কেন ? সে না এখানেই ছিল । সে ত কই আমার সঙ্গে যায় নাই । যাই, এখন আমি এ ঘটিটে রেখে আসিগে ।

[ প্রস্থান ।

পদ্মা । ( চতুর্দিক অবলোকন করিয়া ) কি আশ্চর্য্য ! সখি, আমি বোধ করি, এ চিত্রকরী কোন সামান্য স্ত্রী না হবে ।

সখী । ( চতুর্দিক অবলোকন করিয়া ) তাই ত, এ কি পাখী হয়ে উড়ে গেল ?

পদ্মা । দেখ, সখি, তুমি কারো কাছে এ কথার প্রসঙ্গ করো না ।

সখী । প্রিয়সখি, তুমি যদি বারণ কর, তবে নাই বা কল্যেয়ম । ( নেপথ্যে নানাবিধ বস্ত্রধ্বনি ) ঐ শোন । সঙ্গীত-শালায় গানবাদ্য আরম্ভ হলো । চল, আমরা যাই' ।

পদ্মা । সখি, তুমি বাও, আমি আরও কিছুকাল এখানে থাকতে ইচ্ছা করি ।

সখী । প্রিয়সখি, তুমি না গেলে ক'ওরা কেউ মন দিয়ে গাবে, না বাজাবে ?

পদ্মা । আমি গেলেম্ বল্যে । তুমি গিয়ে নিপুণিকাকে আমার বীণার সুর বাঁধতে বল ।

সখী । আচ্ছা—তবে আমি চল্যেম্ ।

[ প্রস্থান ।

পদ্মা । হে রজনীদেবি, ঐ নিখিল জগতে কোন্ ব্যক্তি এমন্‌ দুঃখী আর্ছে, যে সে তোমার কাছে তার মনের কথা না কয় ? দেখ, এই যে ধুতুরাফুল, এ সমস্ত দিন লজ্জায় আর মনস্তাপে মৌনভাবে থাকে, কেন না, বিধাতা একে পরম-সুন্দরী করেও এর অধরকে বিষাক্ত করেছেন, কিন্তু তুমি এলে এও লজ্জা সম্বরণ করে বিকশিত হয় । জননি, তুমি পরম-দয়াশীলা । ( পরিক্রমণ করিয়া ) হায় ! আমার কি হলো । আজ্‌ কয়েক দিন অবধি আমি প্রতিরাত্রে যে একটি অদ্ভুত স্বপ্ন দেখ্‌চি, তার কথা আর কাকে বলবো ? বোধ হয়, যেন একটি পরমসুন্দর পুরুষ আমার পাশে দাঁড়িয়ে এই বলেন— “ কল্যাণি, আমার এই হৃৎসরোবরকে সুশোভিত করার নিমিত্তেই বিধাতা তোমার মতন্‌ কনকপদ্ম সৃষ্টি করেছেন । প্রিয়ে, তুমি আমার ।” এই মাত্র বলে সেই মহাত্মা অন্তর্ধান হন । আর এই তাঁরই প্রতিমূর্তি । এই যে চিত্রকরী, যিনি আমাকে এই অমূল্য রত্ন প্রদান করে গেলেন, ইনিই বা কে ? ( পর্টেরপ্রতি দৃষ্টি নিক্ষেপ ও নিশ্বাস পরিত্যাগ করিয়া ) হে প্রাণেশ্বর, তুমি অন্ধকারময় রাত্রে যে গৃহেশ্বর মন চুরি

করেছ, সে তোমাকে এই মিনতি কচ্যে যে তুমি নির্ভয় হয়ে  
তার আর যা কিছু অরশিফ আছে, তাও এসে অপহরণ কর।

নেপথ্যে : রাজনন্দিনী যে এখনও এলে ন? তিনি না  
এলে ত আমরা গাইতে আরম্ভ করবো না।

পদ্মা । ( স্বগত ) হায় ! আমার এমন দশা কেন ঘটলো ?  
হে স্বপ্নদেবি, এ যদি তোমারই লীলা হয়, তবে তুমি এ  
দাসীকে আর বৃথা যন্ত্রণা দিও না। ( দীর্ঘনিশ্বাস পরিত্যাগ  
করিয়া ) তা আমি এ সকল কথা কি এ জন্মে আর তুলতে  
পারবো ?

( পরিচারিকার পুনঃ প্রবেশ । )

পরি । রাজনন্দিনি, আপনি না এলে ওরা কেউ গাইতে  
চায় না। আর নিপুণিকাও আপনার বীণার সুর বেঁধেচে।

পদ্মা । তবে চল।

[ উভয়ের প্রস্থান ।

( শচী এবং মুরজার প্রবেশ । )

শচী । ( সরোষে ) সখি, রতিকে ত তুমি ভাল করে চেন  
না। ওর অসাধ্য কর্ম কি আছে ? দেখ, কজ্জদেব রাগলে  
ভগবতী পার্শ্বতীও তাঁর নিকটে যেতে ভয় পান, কিন্তু রতি  
অনায়াসে তাঁর কাছে গিয়ে কেঁদে কেঁদে চক্ষের জলে তাঁর  
কোপানল নির্মাণ করে। রতি ফাঁদ পাতলে তাতে কে না  
পড়ে ? অমরকূলে এমন মেয়ে কি আর দুটি আছে ?

মুর । তা ও এখানে এসে কি করেছে ?

শচী । কি না করেছে ? এই মাহেশ্বরীপুরীর রাজা যজ্ঞ-  
সেনের সময়ে পদ্মাবতীর মতন সুন্দরী নারী পৃথিবীতে নাই।  
রতি এই মেয়েটির সঙ্গে দুই ইন্দ্রনীলের বিবাহ দেবার চেষ্টা

পাচ্ছে। সখি, ইন্দ্রনীলকে যদি রক্তি এই স্ত্রীর তুটী দান করে, তবে আমাদের কি আর মান থাকবে ?

মুর। তার সন্দেহ কি? তা ও কি প্রকারে এ চেষ্টা পাচ্ছে, তার কিছু শুনেছ ?

শচী। শুনবো না কেন ? ও প্রতিরাজে এসে ইন্দ্রনীলের বেশ ধর্যে পদ্মাবতীকে স্বপ্নযোগে আলিঙ্গন দেয়, স্তুরতাং মেয়েটিও একেবারে ইন্দ্রনীলের জন্যে যেন উন্মত্তা হয়ে উঠেছে।

মুর। বাঃ, রতির কি বুদ্ধি ?

শচী। বুদ্ধি? আর শোন না। আবার রাজলক্ষ্মীর বেশ ধারণ করে ও গতরাত্রে রাজা যজ্ঞসেনকে স্বপ্নে বলেছে যে যদি পদ্মাবতীর স্বয়ম্বর অতিশীঘ্র মহা সমারোহে না হয় তবে সে স্ত্রীভ্রষ্ট হবে।

মুর। কি আশ্চর্য্য! স্বয়ম্বর হলেইত ইন্দ্রনীল অবশ্যই আসবে। আর ইন্দ্রনীলকে দেখবামাত্রই পদ্মাবতী তাকেই বরণ করবে।

শচী। তা হলে আমরা গেলেম! পৃথিবীতে কি আর কেউ আমাদের মান্বে না পূজা করবে? সখি, তোমাকে আর কি বলবো। এ কথা মনে পড়লে রাগে আমার চক্ষে জল আসে। আর দেখ, রাজা যজ্ঞসেন মন্ত্রীদেব লয়ে আজ এই স্বয়ম্বরের বিষয়ে বিচার কচে।

মুর। তবে ত আর সময় নাই। তা এখন কি কর্তব্য?— ও কি ও? (নেপথ্যে বহুবিধ যন্ত্রধ্বনি) আহা! কি মধুর ধ্বনি। সখি, একবার কাণ দিয়ে শোন। তোমার অমরাকৃতীতেও এমন মধুর ধ্বনি দুর্লভ।

শচী । আঃ, তুমিও যেমন । ও সকল কি আর এখন ভাল লাগে ।

নেপথ্যে । তুই, সেই, আরস্ত করনা কেন ?

নেপথ্যে । চূপ্ কর লো—চূপ্ কর । ঐ শোন্, রাজনন্दिनी আরস্ত কচ্যে । ( বীণাধ্বনি । )

নেপথ্যে । আহা ! রাজনন্दिনি তুমি কি ভগবতী বীণা-পাণীর বীণাটা একেবারে কেড়ে নেছ গা ?

নেপথ্যে । মর, এত গোল করিস্ কেন ?

নেপথ্যে । ( গীত । )

( খাযাজ—মধ্যমান । )

কেন হেরেছিলাম্ তারে ।

বিষম প্রেমের জ্বালা বুঝি ঘটিল আমারে ॥

সহজে অবোধ মন, না জানে প্রেম কেমন,

সাধে হয়ে পরাধীন, নিশিদিন ভাবে পরে ।

কত করি ভুলিবারে, মন তাতে নাহি পারে,

যবে যে ভাবনা করে, সে জাগে অন্তরে ।

শরমে মরম ব্যথা, নারি প্রকাশিতে কোথা, ,

জড়ের স্বপন যথা, মরমে মরি গুমরে ॥

মুর । শচীদেবি, আমরা কি নন্দনকাননে উর্বশী আর চাকনেত্রার মধুরস্বর শুনে মোহিত হলেম্ !

শচী । সখি, তুমিও কি এই প্রজ্বলিত হৃতাশনে আহুতি দিতে প্রবৃত্ত হলে ? দেখ যদি রতির মনস্কামনা সুসিদ্ধ হয়, তবে এই সুধারস দুষ্টি ইন্দ্রনীলই দিবারাত্র পান করবে । ( দীর্ঘনিশ্বাস পরিত্যাগ করিয়া ) সখি যক্ষেশ্বরী, আমার



মতন্ হন্তভাগিনী কি আর দুটি আছে ? লোকে আমাকে বৃথা  
ইন্দ্রাণী বলে। আমার পতি বজ্রদ্বারা কত শত উন্নত পার্বত-  
শৃঙ্গকে চূর্ণ করে উড়িয়ে দেন ; কতশত বিশাল তরুরাজকে  
ভস্ম করে ফেলেন ; কিন্তু আমি, দেখ, একজন অতিক্ষুদ্র মানব-  
কেও যৎকিঞ্চিৎ দণ্ড দিতে পারলেম্ না। হায় ! আমার বেঁচে  
আর সুখ কি !

মুর। তবে, সখি, তোমার কি এই ইচ্ছা যে, ইন্দ্রনীলকে  
শাস্তি দেবার জন্যে এ সুশীলা মেয়েটিকেও কষ্ট দেবে ?

শচী। কেন দেব না ? পরমাম্ চণ্ডালকে দেওয়া অপেক্ষা  
জলে ফেলে দেওয়াও ভাল। দেখ, দুর্ঘটমনের নিমিত্তে  
বিধাতা সময় বিশেষে ভগবতী পৃথিবীকেও জ্বলমগ্না করেন !

মুর। তবে, সখি, চল, আমরা কলিদেবের কাছে যাই,  
তিনি এ বিষয়ের একটা না একটা উপায় অবশ্যই করে দিতে  
পারবেন।

শচী। ( চিন্তা করিয়া ) হ্যাঁ, এ যথার্থ কথা। কলিদেবই  
এ বিষয়ে আমাদের সাহায্য কত্যা পারবেন। তা সখি, চল,  
আমরা শীঘ্র তাঁরই কাছে যাই।

[ উভয়ের প্রস্থান। ]

### দ্বিতীয় গর্ভাঙ্ক।

মাঘেশ্বরীপুরী—রাজনিকেতন।

( কঞ্চুকীর প্রবেশ। )

কঞ্চু। ( স্বগত ) আহা ! শৈলেন্দ্রের গলে শোভে ষেরতন—  
সে অমূল ধন কভু সহজে কি তিনি

প্রদান করেন পারে ? গজরাজ-শিরে  
 ফলে যে মুকুতারাজি, কে লভয়ে কবে  
 সে মুকুতারাজি, যদি না বিদরে আগে  
 সে শিরঃ ? সকলে জানে, সুরাসুর মিলি  
 মথিয়া কত যতনে সাগর, লভিলা  
 অমৃত—রুত পীড়নে পীড়ি জলনিধি !  
 হায় রে, কে পারে পরে দিতে ইচ্ছা করি,  
 যে মণিতে গৃহ তার উজ্জ্বল সতত । (চিন্তা করিয়া )  
 বিধির এ বিধি কিন্তু কে পারে লজ্জিতে ?—  
 ছায়ায় কি ফল কবে দরশে তরুর ?  
 সরোবরে ফুটিলে কমল, লোকে তারে  
 তুলে লয়ে যায় স্মখে ! মলয়-মাকত,  
 কুসুম-কানন-ধন সুরভিরে হরি,  
 দেশ দেশান্তরে চলি যান কুতূহলে ।  
 হিমাদ্রির কণক ভবন ত্যজি সতী—  
 ভবভাবিনী ভবানী—ভঞ্জন ভবেশে । ( পরিক্রমণ )  
 যার ঘরে জনমে ছুহিতা, এ যাতনা  
 ভোগী সে ! ( দীর্ঘনিশ্বাস )———

প্রভো, তোমারই ইচ্ছা ! যা হোক, মহারাজ যে এখন  
 রাজনন্দিনী পদ্মাবতীর স্বয়ম্বরে সম্মত হয়েছেন, এ পরম  
 আঙ্কাদের বিষয় । এখন জগদীশ্বর এই ককনু যে কন্যাটী  
 যেন একটি উপযুক্ত পাত্রের হাতেই পড়ে ! ( নেপথ্যাভিমুখে  
 অবলোকন করিয়া প্রকাশে ) কে ও ?

( সখীর প্রবেশ । )

বসুমতী না ? আরে এস, দিদি এস ! আমি বৃদ্ধত্রাঙ্কণ—

কালক্রমে প্রায়ই অন্ধ হয়েছি, কিন্তু তবু ও পূর্ণশশীর উদয়  
হল্যে তাঁকে চিন্তে পারি । এস এস ।

সখী । ঠাকুরদাদা, প্রণাম করি ।

কঞ্চু । কল্যাণ হউক ।

সখী । মুহাশয়, আমার প্রিয়সখীর নাকি স্বয়ম্বর হবে ?

কঞ্চু । এ কথা তোমাকে কে বল্যে ?

সখী । যে বলুক না কেন ? বলি এ সত্য ত ?

কঞ্চু । বাঃ, কেমন করে সত্য হবে ? তোমার প্রিয়সখী ত  
আর পাঞ্চালী নন যে তাঁর পঞ্চস্বামী হবে ! আমি বেঁচে  
থাকতে তাঁর কি আর বিবাহ হতে পারে ? গৌরী কি স্বরকে  
বৃদ্ধ বল্যে ত্যাগ কতে পারেন ? ( হাস্য । )

সখী । ( স্বগত ) দূর বুড়ে । ( হস্তধারণ করিয়া প্রকাশে )  
ঠাকুরদাদা, আপনার পায়ে পড়ি, বলুন না, এ কথাটা কি সত্য ?

কঞ্চু । আরে কর কি ? পায়ে হাত দিও না । তুমি কি  
জান না, নীরস তরুকে দাবানল স্পর্শ করলে, সে যে তৎক্ষণাৎ  
জ্বলে যায় ।

সখী । তবে আমি চল্যম্ ।

কঞ্চু । কেন ?

সখী । এখানে থেকে আবশ্যিক কি ? আপনার কাছে ত  
কোন কথাটিই পাওয়া যায় না ।

কঞ্চু । ( হাস্যবদনে ) আরে, আমি রাজসংসারে চাকুরী  
করে বুড়ে হয়েছি । আমাকে ঘুস না দিলে কি আমার দ্বারা  
কোন কর্ম হতে পারে ? ঘানিগাছে তেল না দিলে সে কি  
সহজে ঘোরে ?

সখী । 'আচ্ছা ! রাজমাতার জন্যে সোণার হামান্দিস্তায়

যে পান মসলা দিয়ে ছেঁচে, তাই আপনাকে না হয় একটু এনে দেব ? তা হলে ত হবে ?

কঞ্চু । স্নেহ পান নিয়ে কি হবে ! মিঠাই কিছু দিতে পার কি না ?

সখী । হাঁ ! পারবো না কেন ?

কঞ্চু । তবে বলি । এ কথা যথার্থ । তোমার প্রিয়সখীর স্বয়ম্বর হবে ।

সখী । ( ব্যগ্রভাবে ) হ্যাঁ মহাশয়, কবে হবে ?

কঞ্চু । অতি শীঘ্রই হবে । মহারাজ মন্ত্রীবরকে স্বয়ম্বরের সমুদয় আয়োজন কত্যা অনুমতি করেছেন । আর কাল প্রাতে দূতেরা নিমন্ত্রণপত্র লয়ে দেশ দেশান্তরে যাত্রা করবে । দেখো, এ পদ্মের গন্ধে অলিকুল একবারে উন্নত হয়ে উড়ে আসবে । ও কি ও ! তুমি যে কাঁদতে আরম্ভ কল্যে । তোমাকে ত আর শ্বশুরবাড়ী যেতে হবে না ।

সখী । ( চক্ষু মুচিয়া ) কৈ ? আমি কাঁদছি আপনাকে কে বললে ? ( রোদন । )

কঞ্চু । আরে ঐ যে । কি উৎপাত ! তা তোমার জন্যেও না হয় একটা বর ধরে দেব, তার নিমিত্তে ভাবনা কি ? তোমার প্রিয়সখী ত আর সকলকে বরণ করবেন না । আর যদি তুমি রাজকূলে বিয়ে কত্যা না চাও—তবে শর্মা ত রয়েছেন ।

সখী । আঃ, যাও, মিছে ঠাউ করো না । ( রোদন । )

( পরিচারিকার প্রবেশ । )

পরি । কঞ্চুকী মহাশয়, প্রণাম করি ।

কঞ্চু । এস, কল্যাণ হউক । ( স্বগত ) এ গস্তানী আবার কোথ থেকে এসে উপস্থিত হলো ? কি আপদ ! এ যে গঙ্গায়

আবার যমুনা এসে পড়লেন । এখন ত আর জলের অভাব থাকবে না ।

সখী । মাধবি, প্রিয়সখী যথার্থই এত দিনের পর আমাদের ছেড়ে চললেন । ( রোদন । )

পরি । ( ব্যগ্রভাবে ) কেন, কেন ? কি হয়েছে ?

সখী । আমরা যে স্বয়ম্বরের কথা শুমেছিলাম, সে সকলই সত্য হলো । ( রোদন । )

কঞ্চু । ( স্বগত ) আহা ! প্রণয়পদ্বের মৃগালে যে কণ্টক জন্মে, সে কি সামান্য তীক্ষ্ণ ? আর তার বেঁধনে যে প্রাণ কি পর্য্যন্ত ব্যথিত হয়, তা সে বেদনা যে সহ্য করেছে, সেই কেবল বলতে পারে । ( প্রকাশে ) আরে, তোরা যে কেঁদেই অস্থির হলি ! এমন কথা শুনে কি কাঁদতে হয় ? রাজনন্দিনী কি চিরকাল আইবড় থাকলে তোরা সুখী হবি ?

পরি । বালাই ! তাঁর শত্রু আইবড় থাকুক, তিনি থাকবেন কেন ?

কঞ্চু । তবে তোরা কাঁদিস কেন লা ?

পরি । তুমিও যেমন । কে কাঁদচে ? তুমি কাণা হলে নাকি ?

কঞ্চু । তবে তুই, ভাই, একবার হাস্ ত, দেখি ।

পরি । হাসবো না কেন ? ( হাস্য ও রোদন । )

কঞ্চু । বেশ ! ওলো মাধবি, লোকে বলে রোঁজে বৃষ্টি হলে খেঁকশিয়ালীর বিয়ে হয়, তা আমি দেখছি তোরাও বিয়ে অতি নিকট ।

পরি । কেন ? আমি কি খেঁকশিয়ালী ! যাও, মিছে গাল দিও না ।

সখী । ওলো মাধবি, চল্ আমরা যাই ।

পরি । চল ।

[ উভয়ের ক্রন্দন করিতে করিতে প্রস্থান ।

কঞ্চু । ( স্বগত ) আমাদের পদ্মাবতীর রূপ লাভ্য দেখলে কোন মতেই বিশ্বাস হয় না যে, এর মানরকুলে জন্ম । সৌদামিনী কি কখন ভূতলে উৎপন্ন হয় ? আর এ যে কেবল সৌন্দর্য্য গুণে চক্ষুর সুখকরী মাত্র, তা নয়,—এমন দয়াশীলা পরোপকারিণী কামিনী কি আর আছে ? আর তা না হবেই বা কেন ? পারিজাত পুষ্প কি কখন সৌরভহীন হতে পারে ? আহা ! এ মহারহ রত্ন কোন্ রাজগৃহ উজ্জ্বল করবে হে ?

নেপথ্যে বৈতালিক ।

গীত ।

পরজ কালংড়া—একতারা ।

অপরূপ আজিকার রাজসভা শোভিল ।

. জিনি অমরাপুরী, নৃপপুর হইতেছে ;

বিভবে সুরেন্দ্র লাজ পাইল ॥

মোহনমুরতি অতি রাজন রাজিছে,

রতিপতি ভাতি হেরি মোহিল ।

তুলনা দিবার তরে, রজনী সে আপনি

শশীরে সাজায়ে ধনী আনিল ॥

কঞ্চু । ( স্বগত ) এই ত মহারাজ সভা হতে গাত্রোথান কল্যেন্ । এখন যাই, আপনার কর্ম দেখিগে ।

[ প্রস্থান ।

ইতি দ্বিতীয়াক্ষ ।

## তৃতীয়াক্ষ ।



### প্রথম গর্ভাক্ষ ।

মাহেশ্বরীপুরী—রাজনিকেতন-সমিধানে মদনোদ্যান ।

( ছদ্মবেশে রাজা ইন্দ্রনীল এবং বিদুষকের প্রবেশ । )

রাজা । সখে মানবক্ ।

বিদূ । মহারাজ—

রাজা । আরে ও আবার কি ? আমি এক জন বর্ণিক ; তুমি আমার মিত্র ; আমরা দুজনে এই মাহেশ্বরী পুরীর রাজকন্যা পদ্মাবতীর স্বয়ম্বরসমারোহ দেখবার জন্যেই এ রাজ্যে এসেছি—

বিদূ । আজ্ঞা—আর বলতে হবে না ।

রাজা । তবে তুমি এই শিলাতলে বসো , আমি ঐ দেবালয়ের নিকটে -সরোবর থেকে একটু জলপান কর্যে আসি । আঃ, এই নগর ভ্রমণ করে আমি যে কি পর্য্যন্ত ক্লান্ত হয়েছি তার আর কি বলবো ।

বিদূ । তবে আপনি কেন এখানে বসুন না, আমিই আপনাকে জল এনে দিচ্ছি । ব্রাহ্মণের জল খেলে ত আর বেগের জাত্ যায় না ।

রাজা । ( সহাস্রবদনে ) সখে, তা ত যায় না বটে, কিন্তু জল আনবে কিসে করে ? এখানে পাত্র কোথায় ? তুমিও আর পবনপুত্র হনুমান নও, যে ঔষধ না পেয়ে একবারে গন্ধ-

মাদনকে উপড়ে এনে ফেলবে ! তা তুমি থাক, আমি আপ-  
নিই যাই ।

[ প্রস্থান ।

বিদু । ( স্বগত ) হায় ! আমার কি ছুরদৃষ্ট ! দেখ, এই  
মাহেশ্বরী পুরীর রাজার মেয়ের স্বয়ম্বর হবু বল্যে, প্রায়  
একলক্ষ রাজা এখানে এসে উপস্থিত হয়েছে ; আর এই নগ-  
রের চারিদিকে যে কত ভাষু আর কানাত পড়েছে তার  
সুখ্যা নাই ! কত হাতী, কত ঘোড়া, কত উট, কত রথ,  
আর যে কত লোক জন এসে একত্র হয়েছে তা কে গুণে ঠিক  
কত্যা পারে ? আর কতশত স্থানে যে নট নটীরা নৃত্যগীত  
কচে তা বলা ছুফর । আর যেমন বর্ষাকালে জল পর্ষত থেকে  
শত শ্রোতে বেরিয়ে যায়, রাজভাণ্ডার থেকে সিদে পত্র  
তেম্নিই বেকচে । আহা ! কত যে চাল, কত যে তেল, কত  
যে লবণ, কত যে ঘি, কত যে সন্দেশ, কত যে দই, কত যে  
ছুধ, ভায়ে ভায়ে আস্চে যাচে তা দেখলে একেবারে চক্ষুঃ-  
স্থির হয় । রাজাবেটার কি অতুল ঐশ্বর্য ! ( দীর্ঘনিশ্বাস  
পরিত্যাগ করিয়া ) তা দেখ, এ হতভাগা বামণের কপালে  
এর কিছুই নাই । আমাদের মহারাজ কল্যে ক্ৰি, না সন্দেশ  
যত লোকজন এসেছিল তাদের সকলকে দূরে রেখে কেবল  
আমাকে লয়ে ছদ্মবেশে এ নগরে এসে চুকেছেন । এতে যে  
ওঁর কি লাভ হবে তা উনিই জানেন । তবে লাভের মধ্যে  
আমি দ্রিদ্ ব্রাহ্মণ আমার দক্ষিণাটি দেখুচি লোপাপত্তি  
হবে । হায় ! একি সামান্য ছুখের কথা ? ( চিন্তা করিয়া )  
মহারাজু একটা মেয়ে মানুষকে স্বপ্নে দেখে এই প্রতিজ্ঞা করে  
বসেছেন, যে তাকে না পেলে আর কাকেও বিয়ে করবেন না ।



হায়! দেখে দেখি, এ কত বড় পাগ্লামি । আর—আমি যে রাত্রি স্বপ্নে নানা রকম উপাদেয় মিষ্টান্ন খাই তা বল্যে কি আমার ব্রাহ্মণী যখন খোড় ছেঁচকি, কি কাঁচকলা ভাতে, কি বেগুন পোড়া, এনে দেয়, তখন কি সে সব আমি না খেয়ে পাতে ঠেলে রেখে দি ? সাগর সকল জলই গ্রহণ করেন । অগ্নিদেবকে বা দাও তাই তিনি চক্ষুর নিমিষে পরিপাক কর্যে ভস্ম করে ফেলেন ।

( রাজার পুনঃ প্রবেশ । )

রাজা । কি .হে সখে মানবক, তুমি যে একবারে চিন্তা সাগরে মগ্ন হয়ে রয়েছো ?

বিদু । মহারাজ—

রাজা । মর্ বানর । আবার ?

বিদু । আজ্ঞা—না । তা আপনার এত বিলম্ব হলো কেন ?

রাজা । সখে, আমি এক অদ্ভুত স্বয়ম্বর দেখতে ছিলাম ।

বিদু । বলেন কি ? কোথায় ?

রাজা । সখে, ঐ সরোবরে কমলিনী আজ যেন স্বয়ম্বর হয়েছেন । আর তার পাণিগ্রহণ-লোভে 'ভগবান্' সহস্ররশ্মি, মলয়মাকুত, অলিরাজ, আর রাজহংস—এঁরা সকলেই এসে উপস্থিত হয়েছেন । আর কত যে কোকিলকুল মঙ্গল-ধ্বনি কচ্যে তা আর কি বলবো ? এসো সখে, আমরা ঐ সরোবরকূলে যাই ।

বিদু । ভাল—মহাশয়, আপনি যে আমাকে নিমন্ত্রণ কচ্যেন, তা বলুন দেখি, আমার দক্ষিণা কে দেবে ?

রাজা । কেন ? কমলিনী আপনিই দেবে । তার সুরভি

মধু দিয়ে সে যে তোমার চিত্তবিনোদ করবে তার কোন সন্দেহ নাই।

বিদূ। হা! হা! হা! ( উচ্চহাস্য ) মহাশয়, আমি ব্রাহ্মণ, আমার কাছে কি ওসব ভাল লাগে? হয় ঢাকাকড়ি—  
নয় খাছড়ব্য—এই ছুটার একটা না একটা হল্যে কিঁ আমি উঠি।  
রাজা। চল হে, চল, না হয় আমিই দেব।

বিদূ। হাঁ—এ শোনবার কথা বটে। তবে চলুন।

[ উভয়ের প্রস্থান।

( সখী এবং পরিচারিকার প্রবেশ। )

সখী। মাধবি, আমি ত আর চলতে পারি না। উঃ,  
আমার জন্মেও আমি কখন এত হাঁটি নাই। আমার সর্কাদে  
যে কত বেদনা হয়েছে, তার আর বলবো কি? বোধ করি,  
আমাকে এখন চারি পাঁচ দিন বুঝি কেবল বিছানাতেই পড়ে  
থাকতে হবে।

পরি। ও মা! সেকি? রাজনন্দিনীর স্বয়ম্বরের আর ছুটি-  
দিন বই ত নাই! তা তুমি পড়ে থাকলে কি আর কর্ম চলবে?

সখী। না চললে আমি কি করবো? আমার ত আর  
পাষাণের শরীর নয়।

পরি। সে কিছু মিছে কথা নয়।

সখী। ( পট অবলোকন করিয়া ) দেখ, আমি প্রায়সখীকে  
না হবে ত প্রায় সহস্রবার বলেছি যে এ প্রতিমূর্তি কখনই  
মনুষ্যের নয়, কিন্তু আমার কথায় তিনি কোন মতেই বিশ্বাস  
করেন ন্ন।

পরি। কি আশ্চর্য্য! এই যে আমরা আজ সমস্ত দিন

বেড়িয়ে বেড়িয়ে প্রায় একলক্ষ রাজা দেখে এলেম, এদের মধ্যে এমন একটি পুরুষ নাই যে তাকে এঁর সঙ্গে এক মুহূর্তের জন্যেও তুলনা করা যায় । হায়, এ মহাপুরুষ কোথায় ?

সখী । স্তম্ভকপর্কিত যে কোথায় তা কে বলতে পারে ? কনকলক্ষা কি লোকে আর এখন দেখতে পায় ?

পরি । তা সত্য বটে । তবে এখন কি করবে ?

সখী । আর কি করবো ! আয়, এই উদ্যানে একটুখানি বিশ্রাম করে প্রিয়সখীর কাছে এ সকল কথা বলিগে । ( শিলা-তলে উপবেশন )

পরি । আহা ! রাজনন্দিনীকে এ কথা কেমন করে বলবে ? এ কথা শুনে তিনি যে কত দুঃখিত হবেন, তা মনে পড়লে আমার চখে জল আসে ।

সখী । তা এ মায়ার হেমমৃগ ধরা তোর আমার কর্ম নয় । এ যে একবার দেখা দিয়ে, কোন্ গহন কাননে গিয়ে পালিয়ে রইলো, তা কে বলতে পারে ? জগদীশ্বর এই ককন, যেন প্রিয়সখী এর প্রতি লোভ করয় অবশেষে সীতাদেবীর মতন কোন ক্লেশে না পড়েন । এ যে দেবমায়ী তার কোন সন্দেহ নাই । ( পরিচারিকার প্রতি ) তুই যে বসছিস্ না ? তোর কি এত হেঁটেও কিছু পরিশ্রম হয় নাই ?

পরি । হয়েছে বই কি ! কিন্তু রাজনন্দিনীর দুঃখের কথা ভাবলে আর কোন দুঃখই মনে পড়ে না । যে গায়ে সাপের বিষ প্রবেশ করেছে, সে কি আর বিছের কামড়ে জ্বলে । ( সখীর নিকটে ভূতলে উপবেশন ) এখন এ স্বয়ম্বরটা হয়ে গেলেই বাঁচি ।

সখী । তুই দেখিস্ এ স্বয়ম্বরে কোন না কোন একটা ব্যাঘাত  
অবশ্যই ঘটে উঠবে ।

পরি । বালাই ! এমন অমঙ্গল কথা কি মুখে আন্তে  
আছে ?

সখী । তুই প্রিয়সখীর প্রতিজ্ঞা ভুলে গেলি না কি ?  
ভোর কি মনে নাই যে যদি এ লক্ষ রাজার মধ্যে, তিনি যে  
মহাপুরুষকে স্বপ্নে দেখেছেন, তাঁর সেই প্রাণেশ্বরকে না পান্  
তবে তিনি আর কাকেও বরণ করবেন না ?

নেপথ্যে । ( উচ্চহাস্য । )

সখী । ( নেপথ্যাভিমুখে অবলোকন করিয়া সচকিতে ) ও  
আবার কি ?

পরি । কেন, কি হলো ? ( উভয়ের গাজ্রোস্থান । )

পরি । ( সত্রাসে ) ওমা ! চল আমরা এখান থেকে পা-  
লাই । এ মহাস্বয়ম্বরে যে কত দেব, দানব, যক্ষ, রক্ষঃ,  
এসে উপস্থিত হয়েছে, তা কে বলতে পারে ? এ নির্জন  
বনে—

সখী । চূপ্ কর লো । চূপ্ কর । আর ঐ দেখ্—

পরি । ( নেপথ্যাভিমুখে অবলোকন করিয়া ) কি আশ্চর্য্য !  
ঐ না পুষ্করিণীর ধারে ছুই জন পুরুষমানুষ বসে রয়েছে ?  
আছা ! ওদের মধ্যে এক জনের কি অপরূপ রূপলাবণ্য !

সখী । ( পট অবলোকন করিয়া ) মাধবি, এত ক্ষণের পর,  
বোধ করি, আমাদের পরিশ্রম সফল হলো । ঐ সুন্দর পুরুষ-  
টির দিকে একবার বেশ করে চেয়ে দেখ্ দেখি ।

পরি । ভাই ত ! কি আশ্চর্য্য ! এ কি গগনের চাঁদ  
ভূতলে এসে উপস্থিত হলো ?

সখী । (সপুলকে ) এ ত গগনের চন্দ্র নয়, এ যে আমার প্রিয়সখীর হৃদয়াকাশের পূর্ণচন্দ্র ।

পরি । ( পট অবলোকন করিয়া ) তাই ত ? এ কি আশ্চর্য্য ! তা ঝুঁকে যে রাজবেশে দেখ্চি না ।

সখী । তাতে বয়ে গেল কি ? ( চিন্তা করিয়া ) মাধবি, তুই এক কর্ম কর । তুই অস্ত্রপুরে দৌড়ে গিয়ে, প্রিয়সখীকে একবার এখানে ডেকে আনগে, যদিও ঐ মহাপুরুষ মনুষ্য না হন, তবু প্রিয়সখী ঝুঁকে একবার চক্ষে দর্শন করয়ে জন্ম সফল করুন ।

পরি । রাজনন্দিনী কি এখন অস্ত্রপুর হতে একলা আস্তে পারবেন ?

সখী । তুই একবার বেয়ে দেখেই আয় না কেন । যদি আস্তে পারেন ভালই ত; আর না পারেন আমরা ত দোষ হতে মুক্ত হলেম ।

পরি । বলেছ ভাল—এই আমি চল্লেম ।

[ প্রস্থান ।

সখী । ( নেপথ্যাভিমুখে অবলোকন করিয়া স্বগত ) ইনি কি মনুষ্য না কোন দেবতা, মায়াবলে মানবদেহ ধারণ করয়ে এই স্বয়ম্বর দেখতে এসেছেন ? হায়, একথা আমি কাকে জিজ্ঞাসা করবো ? এখন প্রিয়সখী এলে বাঁচি । আহা ! বিধাতা কি এমন সুন্দর বর প্রিয়সখীর কপালে লিখেছেন ?

( পদ্মাবতীর সহিত পরিচারিকার পুনঃ প্রবেশ । )

পদ্মা । সখি, তুমি আমাকে ডেকে পাঠিয়েছ কেন ? কি সংবাদ, বল দেখি শুনি ?

সখী । সকলই সুসংবাদ । তা এসো এই শিলাতলে  
বসো ।

পদ্মা । সখি, আমার প্রাণনাথ কি তোমাকে দর্শন দিয়ে-  
ছেন ? ( উপবেশন । )

সখী । ( পদ্মাবতীর নিকটে উপবেশন করিয়া ) হ্যাঁ—  
দিয়েছেন ।

পদ্মা । ( ব্যগ্রভাবে সখীর হস্তধারণ করিয়া ) সখি, তুমি  
তাকে কোথায় দেখেছ ?

সখী । ( সহাস্রবদনে ) প্রিয়সখি, তুমি স্থির হয়ে ঐ  
অশোকবনের দিকে একবার চেয়ে দেখ দেখি ।

পদ্মা । কেন ? তাতে কি ফললাভ হবে ?

সখী । বলি দেখই না কেন ?

পদ্মা । ( নেপথ্যাভিমুখে অবলোকন করিয়া ) ঐ ত ভগ-  
বান অশোকবৃক্ষ বসন্তের আগমনে যেন আপনার শতহস্তে  
পুষ্পাঞ্জলি ধারণ করে, ঋতুরাজের পূজা করবার অপেক্ষায়  
দাঁড়িয়ে রয়েছেন ।

সখী । ভাল, বল দেখি, ঋতুরাজ বসন্ত কোথায় ?

পদ্মা । সখি, একি পরিহাসের সময় !

সখী । পরিহাস কেন ? ঐ বেদিকার দিকে একবার চেয়ে  
দেখ দেখি ?

পদ্মা । ( নেপথ্যাভিমুখে অবলোকন করিয়া ) সখি, আমি  
কি আবার নিজায় আকৃত হয়ে স্বপ্ন দেখতে লাগলেম ?  
( আত্মগত ) হে হৃদয়, এত দিনের পর কি তোমার নিশাবসান  
কতো তুমার দিনকর উদয়াচলে দর্শন দিলেন । ( প্রকাশে )

সখী! তুমি আমাকে ধর—( অচেতন হইয়া সখীর  
কোড়ে পতন । )

সখী! হায়! এ কি হলো? প্রিয়সখী যে সহসা অচেতন  
হয়ে পড়লেন! ( পরিচারিকার প্রতি ) মাধবি, তুই শীঘ্র  
গিয়ে একটু জল আন ত ।

পরি। এই বাই ।

[ বেগে প্রস্থান ।

সখী। ( স্বগত ) হায়! আমি প্রিয়সখীকে এ সময়ে এ  
উদ্যানে ডাকিয়ে এনে এ কি কল্যেয় ?

( বেগে রাজার পুনঃপ্রবেশ । )

রাজা। এ কি? সুন্দরি! এ স্ত্রীলোকটির কি হয়েছে?

সখী। মহাশয় ঐর মুচ্ছা হয়েছে।

রাজা। কেন?

সখী। তা আমি এখন আপনাকে বলতে পারি না।

রাজা। ( স্বগত ) লোকে বলে যে পূর্ণশশীর উদয় হলো  
সংগর উথলিত হন, তা আমারও কি সেই দশা ঘটলো!  
( পুনরবলোকন করিয়া ) এ কি? এই যে আমার মনোমোহিনী,  
যাঁকে আমি স্বপ্নযোগে কয়েকবার দর্শন করেছিলেম। তা  
দেবতার। কি এত দিনের পর আমার প্রতি স্নেহসম্মত হয়ে  
আমার হৃদয়নিধি মিলিয়ে দিলেন।

পদ্মা। ( চেতন পাইয়া দীর্ঘনিশ্বাস পরিত্যাগ । )

রাজা। ( সখীর প্রতি ) শুভে, যেমন নিশাবসানে সর-  
সীতে নলিনী উন্মীলিতা হয়, দেখ, তোমার সখীও মোহাস্তে  
আপন কমলাকি উন্মীলন কল্যেন। আহা! ভগবতী জাহ্নবী

দেবী, ভগ্নতট-পতনে কিঞ্চিৎকালের নিমিত্তে কলুষা হয়ে, এইরূপেই আপনু নির্মূল শ্রী পুনর্ধারণ করেন ।

পদ্মা ! ( গাত্রোস্থান করিয়া যুত্বস্বরে সখীর প্রতি ) সখি, চল, আমরা এখন অস্তঃপুরে যাই । এ উদ্যানে আমাদের আর থাকা উচিত হয় না ।

রাজা ! ( স্বগত ) আহা ! এ ও সেই মধুর স্বর । আমার বিবেচনায় তৃষ্ণাতুর ব্যক্তির কর্ণে জলস্রোতের কলকল ধ্বনিও এমন মিষ্ট বোধ হয় না । ( প্রকাশে সখীর প্রতি ) সুন্দরি, তোমার প্রিয়সখী কি আমার এখানে আসাতে বিরক্ত হইলেন !

সখী । কেন ? বিরক্ত হবেন কেন ?

রাজা । তবে যে উনি এখান থেকে এত দুরায় যেতে চান ?

সখী । আপনি এমন কথা কখনই মনে করবেন না । তবে কি না আমরা এখন সকলেই ব্যস্ত ।

রাজা । শুভে, তবে তুমি তোমার এ পরমসুন্দরী সখীর পরিচয় দিয়া আমাকে চরিতার্থ করে যাও ।

সখী । মহাশয়, ইনি রাজনন্দিনী পদ্মাবতীর একজন সখীমাত্র ।

রাজা । কি আশ্চর্য্য ! আমরা জানি যে বিধাতা কমলিনীকেই পুষ্পকুলের ঈশ্বরী কর্যে সৃষ্টি করেছেন । তা তাঁর অপেক্ষা কি আরও সুচাক পুষ্প পৃথিবীতে আছে ?

পদ্মা ! ( স্বগত ) আহা ! প্রাণনাথ কি মিষ্টভাষী ! তা ভগবান গন্ধমাদন কি কখন সৌরভহীন হতে পারেন ?

সখী । মহাশয় ! আপনি যদি এ দাসীর অপরাধ মার্জন করেন তবে আমি আপনাকে একটি কথা জিজ্ঞাসা করি ?



রাজা। তাতে দোষ কি? যদি আমি কোন প্রকারে তোমাদের মনোরঞ্জন কতে পারি, তবে তা অপেক্ষা আমার আর সৌভাগ্য কি?

সখী। মহাশয়, কোন্ রাজধানী এখন আপনার বিরহে কাতরা হয়েছে, এ কথা আপনি অনুগ্রহ করে আমাদের বলুন।

পদ্মা। (স্বগত) এতক্ষণের পর বসুমতী আমার মনের কথাটিই জিজ্ঞাসা করেছে।

রাজা। (সহাস্র বদনে) সুন্দরি, আমার বিদর্ভনাম্নী মহানগরীতে জন্ম। সে নগরের রাজা ইন্দ্রনীলের সঙ্গে আমি তোমাদের রাজনন্দিনীর স্বয়ম্বর মহোৎসব দেখার নিমিত্তেই এ দেশে এসেছি।

পদ্মা। (স্বগত) এ কি অসম্ভব কথা! এঁর কি তবে রাজকুলে জন্ম নয়?

(জল লইয়া পরিচারিকার পুনঃপ্রবেশ।)

সখী। তোমার এত বিলম্ব হলো কেন?

পরি। আমাকে ঘণ্টার জন্যে অস্তঃপুর পর্য্যন্ত দৌড়ে যেতে হয়েছিল।

সখী। তা সত্য বটে। তা এ কথা অস্তঃপুরে কেউ টের পায় নাই।

পরি। না, এ কথা কেউ টের পায় নাই, কিন্তু ওরা সকলে মদনের পূজা কতে আসচে।

সখী। তবে চল, আমরা যাই।

রাজা। (সখীর প্রতি) সুন্দরি, আমি কি তবে তোমাদের চন্দ্রানদের আর এ জন্মে দর্শন পাব না?

পদ্মা । ( সখীর প্রতিলক্ষ্য করিয়া জীড়া সহকারে ) শ্রিয়-  
সখি, তুমি এ মহাশয়কে বল যে যদি আমাদের ভাগ্যে থাকে,  
তবে আমরা এই উদ্যানেই পুনরায় ওঁর দর্শন পাব ।

নেপথ্যে । কৈ লো কৈ ? রাজনন্দিনী আর বসুমতী  
কোথায় ?

সখী । চল, আমরা যাই ।

পদ্মা । ( কিঞ্চিৎ পরিক্রমণ করিয়া ) উহু । এ কি—

সখী । কেন ? কেন ? কি হলো ?

পদ্মা । সখি, দেখ, এই নুতন তৃণাক্ষুর আমার পায়ে  
বাজতে লাগলো । উহু, আমি ত আর চলতে পারি না,  
তোমরা একজন আমাকে ধর । ( রাজার প্রতি লজ্জা এবং  
অনুরাগ সহকারে দৃষ্টিপাত । )

সখী । এই এসো ।

[ পদ্মাবতীকে ধারণ করিয়া সখী এবং

পরিচারিকার প্রস্থান ।

রাজা । ( স্বগত ) হে সৌদামিনি, তুমি কি আমার এ  
মেঘাবৃত হৃদয়াকাশকে আরও তিমিরময় করবার জন্যে  
আমাকে কেবল এক মুহূর্তের দর্শন দিলে । ( দীর্ঘনিশ্বাস  
পরিত্যাগ করিয়া ) হায় ! তা এ ঘোর অন্ধকার তোমার  
পুনর্দর্শন ব্যতীত কি আর কিছুতে কখন বিনষ্ট হবে ?

নেপথ্যে । ( বহুবিধ যন্ত্রধ্বনি । )

রাজা । নেপথ্যাভিমুখে দৃষ্টিপাত করিয়া স্বগত ) এই যে  
রাজকুলবালারা গানবাদ্য কত্বে কত্বে ভগবান কন্দর্পের  
মন্দিরের দিকে যাচ্ছে ।

নেপথ্যে । নাচলো, নাচ । এই দেখ্ আমি ফুল ছড়াচ্যি ।  
নেপথ্যে । ( গীত । )

রাগিনী খায়াজ,—ভাল যৎ ।

চল সকলে আরাধিব কুসুমবাণে ।  
সঘনে করতালি দেহ মিলিয়ে,  
যতনে পূজিব হরিশ মনে ॥  
বাছিয়া তুলিয়াছি নানা কুসুম,  
অঞ্জলি পুরিয়া দিব চরণে ।  
সখীর পরিণয়ে শুভ সাধিতে,  
তুষিব দেবেরে মঙ্গলগানে ॥

রাজা । ( স্বগত ) আহা, কি মধুরধ্বনি ! তা আমার  
আর এস্থলে বিলম্ব করা উচিত হয় না । আমি এ নগরে  
ছদ্মবেশে প্রবেশ কর্যে উত্তমই করেছি । আহা ! এই  
পরম সুন্দরী বামাটি যদি রাজহুহিতা পদ্মাবতী হতো, তবে  
আর আমার সুখের সীমা থাকতো না ।

[ প্রস্থান ।

### দ্বিতীয় গর্তাঙ্ক ।

মাহেশ্বরীপুরী—দেবালয় উদ্যান ।

( পুরোহিত এবং কঞ্চুকীর প্রবেশ । )

পুরো । আহা, কি আক্ষেপের বিষয় ! মহাশয়, যেমন  
ভগবতী ভাগীরথীকে দর্শন কর্যে জগজ্জনগণ হিমাচলকে  
ধন্যবাদ করে, রাজহুহিতা পদ্মাবতীকে দেখে সকলেই আমা-

দের নরপতিকে তদ্রূপ পরম ভাগ্যবান্ বল্যে গণ্য কর্তো ।  
হায়, কোন ছুর্দৈব বিপাকে এ নির্মলমলিলা গঙ্গা যেন অক-  
স্মাৎ রোধপতনে পঙ্কিলা হয়ে উঠলেন্ !

কঞ্চু । ছুর্দৈব বিপাকই বটে । মহাশয়, দেখুন, এ বিপুল  
ভারতভূমিতে প্রতিযোগে কতশত রাজগৃহে এই স্বয়ম্বর কার্য্য  
মহাসমারোহে নিম্পন্ন হয়েছে ; কিন্তু কুত্রাপি ত এরূপ  
ব্যাঘাত কস্মিন্‌কালেও ঘটে নাই !

পুরো । হায় ! এতটা অর্থ কি তবে বুখাই ব্যয় হলো ?

কঞ্চু । মহাশয়, তন্নিমিত্তে আপনি চিন্তিত হবেন না ।  
দেখুন, যে অকুল সাগরকে শতসহস্র নদ ও নদী বারিষরূপ কর  
অনবরত প্রদান করে, তার অমুরাশির কি কোন মতে হ্রাস  
হতে পারে ? তবে কি না এ একটা কলঙ্ক চিরস্থায়ী হয়ে রৈল ।

পুরো । ভাল, কঞ্চুকী মহাশয়, রাজকন্যার স্বয়ম্বর সমাজে  
উপস্থিত না হবার মূল কারণটা কি তা আপনি বিশেষরূপে  
কিছু অবগত আছেন ?

কঞ্চু । আজ্ঞা না, তবে আমি এই মাত্র জানি যে স্বয়ম্বর  
সভায় যাত্রা কালে, রাজবালা, মুহমূহ মুচ্ছা প্রাপ্ত হয়ে,  
এতাদৃশী দুর্কলা হয়ে পড়েছিলেন, যে রাজবৈত্‌ তাঁকে  
গৃহের বহির্গত হত্যে নিষেধ করেন ; সুতরাং স্বয়ম্বর কন্যার  
অনুপস্থিতিতে শুভলগ্ন দ্রষ্ট হওয়ায়, রাজদল অরুতকার্য্য  
হয়ে স্ব স্ব দেশে প্রস্থান কল্যেন ।

পুরো । আহা, বিধাতার নিরীক কে খণ্ডন কত্যে পারে ?  
তা চলুন, আমরা এক্ষণে দেবদর্শন করিগে ।

কঞ্চু ! আজ্ঞা চলুন ।

[ উভয়ের প্রস্থান ।

( সখী এবং পরিচারিকার প্রবেশ । )

সখী । কেমন—আমি বলেছিলাম কি না, যে এ স্বপ্নস্বপ্নে কোন না কোন একটা ব্যাঘাত অবশ্যই ঘটে উঠবে ?

পরি । তাই ত ? কি আশ্চর্য্য ! তা রাজনন্দিনী যে একে-বারে এমন হয়ে পড়বেন, তা কে জানতে !

সখী । আহা, প্রিয়সখীর চুঃখের কথা মনে হলে প্রাণ যে কেমন করে তা আর কি বলবো ! ( রোদন । )

পরি । ভাল, রাজনন্দিনী যে একেবারে এমন হয়ে পড়লেন, এর কারণ কি ?

সখী । আর কারণ কি ? প্রিয়সখী যাঁরে স্বপ্নে দেখে ভাল বাসেন, তিনি ত আর রাজা নন যে তাঁকে প্রিয়সখী পাবেন !

পরি । তা সত্য বটে । ( নেপথ্যাভিমুখে অবলোকন করিয়া ) ও কি ও ? ঐ না সেই বিদর্ভদেশের লোকটী এই দিকে আসছেন ? উনিও যে রাজনন্দিনীকে ভাল বাসেন, তার সন্দেহ নাই ; তা এমন ভাল বাসায় ওঁর কি লাভ হবে ? বামন হয়ে কি কেউ কখন চাঁদকে ধরতে পারে ? চল, আমরা ঐ মন্দিরের আড়ালে দাঁড়িয়ে দেখি, উনি এখানে এসে কি করেন ।

সখী । চল ।

[ উভয়ের প্রস্থান ।

( ছদ্মবেশে রাজা ইন্দ্রনীলের প্রবেশ । )

রাজা । ( স্বগত ) আমার ত এ রাজধানীতে আর বিলম্ব করা কোনমতেই যুক্তিসিদ্ধ নয় । যত রাজগণ এ বৃথা-স্বপ্নস্বপ্নে এসেছিল, তারা সকলেই আপন আপন রাজ্যে প্রস্থান

করেছে। কিন্তু আমি এ পরমমুন্দরী কন্যাটিকে কি প্রকারে পরিত্যাগ করে যাই? (দীর্ঘনিশ্বাস) হে প্রভো অনঙ্গ, যেমন সুরেন্দ্র আপন বজ্রদ্বারা পার্বতরাজের পঙ্কচ্ছেদ করে তাকে অচল করেছেন, তুমিও কি তোমার পুষ্প শরাঘাতে আমাকে তদ্রূপ গতিহীন কতে চাও। (চিন্তা করিয়া) এ স্ত্রীলোকটিকে কোনমতেই আমার রাজমহিষী পদে অভিষিক্ত করা যেতে পারে না। সিংহ সিংহীর সহিতই সহবাস করে। এ রাজবালা পদ্মাবতীর একজন সহচরী মাত্র, তা এর সহিত আমার কি সম্পর্ক? (দীর্ঘনিশ্বাস) হে রতিদেবি, তুমি যে অমূল্যরত্ন আমাকে দান কতে চাও, সে রত্ন শচী এবং যক্ষেশ্বরীর ক্রোধে আমার পক্ষে অস্পর্শীয় অগ্নিশিখা হলো। হায়, পবিত্রা প্রবাহিনী কি তাঁদের অভিশাপে আমার পক্ষে কর্মনাশানদী হয়ে উঠলো? তা আর বৃথা আক্ষেপ কল্যে কি হবে? (সচকিতে নেপথ্যাভিমুখে অবলোকন করিয়া) এ কি?

নেপথ্যে। তুই বেটা কি সামান্য চোর। তুই যে দ্বিতীয় হনুমান।

ঐ। কেন? হনুমান কেন?

ঐ। কেন তা আবার জিজ্ঞাসা করিস? দেখ্‌দেখি— যেমন হনুমান রাবণের মধুবন ভেঙ্গে লণ্ডভণ্ড করেছিল, তুইও আজ আমাদের মহারাজের অমৃতফলবনে সেইরূপ উৎপাত করেছিস। তা তোর ষাখাটা কেটে ফেলাই উচিত।

ঐ। ঙ্গস্।

ঐ। \*বটে? দেও ত হে, বেটাকে যা তুই তিন লাগিয়ে দেও ত।

নেপথ্যে। দোহাই মহারাজের—

( বেগে কতিপয় রক্ষক সহিত বিদুষকের প্রবেশ । )

বিদূ। মহারাজ, আপনি আমাকে রক্ষা করুন।

রাজা। কেন, কি হয়েছে ?

বিদূ। মহারাজ, এ বেটারা সাক্ষাৎ যমদূত।

প্রথম। ধর ত হে, বেটাকে ধরে বাঁধ।

বিদূ। ( রাজার পশ্চাত্তাণ্ডে দণ্ডায়মান হইয়া ) ঈস্।  
ভোর কি যোগ্যতা যে তুই আমাকে বাঁধবি ? ওরে দুফ  
রক্ষক, তুই যদি কনকলঙ্কায় ঢুকতে চাস্, তবে আগে সমুদ্র  
পার হ। এই মহাত্মা বিদর্ভদেশেব রাজা ইস্রনীল রায়।

রাজা। আরে কর কি।

বিদূ। মহারাজ, আপনি যে কে, তা না টের পেলে কি  
এ পাষণ্ড বেটা বা আমাকে অম্নি ছাড়বে। বাপ !

প্রথম। মহাশয়—

বিদূ। মর বেটা নরাধম, তুই কাকে মহাশয় বলিস্ রে ?

রাজা। ( বিদুষকের প্রতি ) চূপ্ কর হে—চূপ কর।  
( রক্ষকের প্রতি ) রক্ষক, তুমি কি বলছিলে ?

প্রথম। মহাশয়—দেখুন। এ ঠাকুরটি আমাদের মহা-  
রাজের অমৃতফলবনে যত পাকা ফল ছিল প্রায় তা সব  
পেড়ে খেয়েছেন।

বিদূ। খাবনা কেন ? আমি খাবনা ত আর কে খাবে ?  
তুই বেটা আমাকে হনুমান বলে গাল দিচ্ছিলি। আচ্ছা,  
আমি যদি এখন হনুমানের মতন তোদের পুরী পুড়িয়ে ভস্ম  
কর্যে যাই, তবে তুই আমার কি কত্যা পারিস্

রাজা । ( জনাস্তিকে বিদূষকের প্রতি ) ও কি কত্যা  
পারে ? কিন্তু অবশেষে তুমি আপনার মুখ পোড়াবে ।  
আর কি ?

( কঙ্কুকী এবং পুরোহিতের পুনঃ প্রবেশ । )

প্রথম । ( কঙ্কুকী এবং পুরোহিতের সহিত একান্তে  
কথোপকথন । )

কঙ্কু । বল কি ? ( অর্ধসর হইয়া ) মহারাজের জয় হউক ।

পুরো । মহারাজ চিরজীবী হউন ।

কঙ্কু । রক্ষক, তুমি এ সংবাদ মহারাজের নিকট অতি  
ভ্রায় লয়ে যাও ।

প্রথম । যে আজ্ঞা । তবে এই আমি চল্লেম ।

পুরো । মহারাজ, আপনার শুভাগমনে এ রাজধানী অদ্য  
রুতার্থ হলো ।

কঙ্কু । হে নরেশ্বর, আপনার আর এস্থলে অবস্থিতি করা  
উচিত হয় না । অনুগ্রহ কর্যে রাজনিকৈতনের দিকে  
পদার্পণ করুন ।

রাজা । ( স্বগত ) এত দিনের পর আজ সকলই বৃথা  
হলো । ( প্রকাশে ) চলুন ।

[ সকলের প্রস্থান ।

( সখী এবং পরিচারিকার পুনঃ প্রবেশ । )

সখী । হ্যালো মাধনি, এ আবার কি ? আমরা কি স্বপ্ন  
দেখছি, না এ বাজীকরের বাজী ?

পরিঃ ও মা, তাই ত ! এ কি রাজা ইন্দ্রনীল, যার কথা  
সকলেই কয় ?



মেপাথ্যে । ( মঙ্গল বাদ্য ও জয়ধ্বনি । )

সখী । কি আশ্চর্য্য ! চল, আমরা এ সব কথা প্রিয়সখীকে  
বলিগে ।

[উভয়ের প্রস্থান ।

ইতি তৃতীয়াক্ষ ।

---

## চতুর্থাঙ্ক ।



### প্রথম গর্ভাঙ্ক ।



বিদর্ভ নগর—তোরণ ।

( সারথিবেশে কলির প্রবেশ । )

কলি । ( স্বগত ) আমি কলি ; এ বিপুল বিখে কে না কাঁপে  
 শুনিয়া আমার নাম ? সতত কুপথে  
 গতি মোর । নলিনীরে সৃজন বিধাতা—  
 জলতলে বসি আমি মৃগাল তাহার  
 হাসিয়া কণ্টকময় করি নিজবলে ।  
 শশাঙ্ক যে কলকী—সে আমার ইচ্ছায় !  
 ময়ূরের চন্দ্রক-কলাপ দেখি, রাগে  
 কদাকারে পাছুখানি গড়ি তার আমি ! (পরিক্রমণ ।)  
 জন্ম মম দেবকুলে ;—অমৃতের সহ  
 গরল জন্মিয়াছিল সাগর-মথনে ।  
 ধর্ম্মাধর্ম্ম সকলি সমান মোর কাছে ।  
 পরের বাহাতে ঘটে বিপরীত, তাতে  
 হিত মোর ; পরদুঃখে সদা আমি সুখী ।  
 ( চিন্তা করিয়া ) এ বিদর্ভপুরে,—  
 নৃপতি রাজেন্দ্র ইন্দ্রনীল ; তার প্রতি  
 অতি প্রতিকূল এবে ইন্দ্রাণী সুন্দরী,  
 আর মুরজারূপসী, কুবের-রমণী ;—  
 এ দৌহার অনুরোধে, মায়া-জালে আমি ।

বেড়িয়াছি নৃপবরে, নিষাদ যেমতি  
 ঘেরে সিংহে ঘোরবনে, বধিতে তাহারে ।  
 মাহেশ্বরীপুরীর ঈশ্বর যজ্ঞসেন—  
 পদ্মাবতী নামে তার সুন্দরী নন্দিনী ;  
 ছদ্মবেশে বরি তারে রাজা ইন্দ্রনীল  
 আনিয়াছে নিজালয়ে ; এ সংবাদ আমি  
 ভাট বেষে রটিয়া দিয়াছি দেশে দেশে ।  
 পৃথিবীর রাজকুল মহারোষে আসি  
 থানা দিয়া বসিয়াছে এ নগর-দ্বারে—

নেপথ্যে । ( ধনুর্ফংকার ও শঙ্খনাদ । )

কলি । ( স্বগত ) ঐ শুন———

বীর দর্পে তা সবার সঙ্কে ঘুরে এবে  
 ইন্দ্রনীল । ( চিন্তা করিয়া ) এই অবসরে যদি আমি  
 রাণী পদ্মাবতীরে লইতে পারি হরি—  
 তা হলে কামনা মোর হবে ফলবতী ।  
 প্রেয়সী-বিরহ শোকে ইন্দ্রনীল রায়  
 হারাইবে প্রাণ, ফণী মণি হারাইলে  
 মরে বিষাদে । এ হেতু সারথির বেশে  
 আসিয়াছি হেথা আমি । ( পরিক্রমণ ) কি আশ্চর্য্য !

অহো—

এ রাজকুলের লক্ষ্মী মহা তেজস্বিনী !  
 ঐর তেঁজে এ পুরীতে প্রবেশ করিতে  
 অক্ষম কি হইনু হে ? ( সহাস্র বদনে ) কেনই না হব ?  
 অমৃত যে দেহে থাকে, শমন কি কভু  
 পারে তারে পরশিতে ? দেখি, ভাগ্যক্রমে

পাই যদি রাণীরে এ তোরণ সমীপে ।  
 ( চতুর্দিক অবলোকন করিয়া সপুলকে ) একি ?  
 ওই না সে পদ্মাবতী ? আয় লোঁ কাশিনি—  
 এইরূপে কুরঙ্গিনী নিঃশঙ্কে অভাগা  
 পাড়ে কিরাতেৱ পথে ; এইরূপে সদা  
 বিহঙ্গী উড়িয়া বসেনিষাদের ফাঁদে ! ( চিন্তা করিয়া )  
 কিঞ্চিৎ কালের জন্যে অদৃশ্য হইয়া  
 দেখি কি করা উচিত । ( অস্তর্ধান । )

( অবগুণ্ঠিকারূতা পদ্মাবতী এবং সখীর প্রবেশ । )

সখী । প্রিয়সখি, এ সময়ে পাঁচীরের বাইরে যাওয়া কোন  
 মতেই উচিত হয় না । তা এসো আমরা এখানেই দাঁড়াই ।  
 আর এ তোরণ দিয়েও কই কেউ ত বড় যাওয়া আসা কচে  
 না ? এ এক প্রকার নিজ্জ্বন স্থান ।

পদ্মা । ( দীর্ঘনিশ্বাস পরিত্যাগ করিয়া ) সখি, আমার  
 মতন্ হতভাগিনী কি আর ছুটি আছে ? দেখ, প্রাণেশ্বর  
 আমার জন্যে কি ক্লেশই না পেলেন ! আর এই যে একটা ভয়-  
 ক্লর সময় আরম্ভ হয়েছে, যদি ভগবতী পার্শ্বতীর চরণপ্রসাদে  
 এ হত্যে আমরা নিস্তার পাই, তবুও যে কত পতিহীনা স্ত্রী, কত  
 পুত্রহীনা জননী, কত যে লোক আমার নাম শুন্লেই শোকা-  
 নলে দুঃস্থ হয়ে আমাকে যে কত অভিসম্পাত দেবে, তা কে  
 বলতে পারে ? হে বিধাতঃ, তুমি আমার অদৃষ্টে যে সুখভোগ  
 লেখো নাই, আমি তার নিমিত্তে তোমাকে তিরস্কার করি না,  
 কিন্তু তুমি আমাকে পরের সুখনাশিনী কল্যে কেন ? ( রোদন । )

সখী । প্রিয়সখি, তুমি এমন কথা মনেও করো না ।

তোমার জন্যেই যে রাজারা কেবল যুদ্ধ করে মর্চ্যে তা নয় ।  
এ পৃথিবীতে এমন কর্ম্ম অনেক স্থানে হয়ে গেছে । দ্রোণদীর  
স্বয়ম্বরে কি হয়েছিল তা কি তুমি শোন নি ?

পদ্মা । সখি, তুমি পাঞ্চালীর কথা কেন কও ? শশীর  
কলঙ্কে তাঁর স্ত্রীর হ্রাস না হয়ে বরঞ্চ বৃদ্ধি হয় ।—

নেপথ্যে । ( ধনুর্ফঙ্কার ছঙ্কারধ্বনি এবং রণবাদ্য । )

পদ্মা । ( সত্রাসে ) উঃ ! কি ভয়ঙ্কর শব্দ ! সখি, তুমি  
জামাকে ধর । এই দেখ বীরদলের পায়ের ভরে বসুমতী  
যেন কেঁপে কেঁপে উঠছেন ।

সখী । ( আকাশমার্গে দৃষ্টিপাত করিয়া ) কি সর্কনাশ !  
প্রিয়সখি, দেখ আকাশ থেকে যেন অগ্নিবৃষ্টি হচ্ছে ! এমন  
অদ্ভুত শরজাল ত আমি কখনও দেখি নাই ।

পদ্মা । কি সর্কনাশ ! সখি, আমার কি হবে ( রোদন । )

সখী । প্রিয়সখি ! তুমি কেঁদোনা ! আর ভয় নাই, ঐ  
দেখ, যখন রাজসারথি এই দিকে আস্চে তখন বোধ হয়  
মহারাজ অবশ্যই শত্রুদলকে পরাভব করে থাকবেন ।

পদ্মা । ( নেপথ্যাভিমুখে অবলোকন করিয়া ) কি সর্ক-  
নাশ ! সারথি যে একলা আস্চে ?

( সারথি বেশে কলির পুনঃপ্রবেশ । )

সারথি, তুমি যে রাজরথ ত্যাগ করে আস্চো ?

কলি । মহিষি, আপনি এত উতলা হবেন না । মহারাজ  
এ দাসকে আপনার নিকটেই পাঠিয়েছেন ।

পদ্মা । কেন ? কি সংবাদ, তা তুমি আমাকে শীঘ্র করে  
বল ।

কলি ! আজ্ঞা—সকলই সুসংবাদ, মহারাজ অন্য এক রথে আরোহণ করে আমাকে এই বলে আপনাদের নিকট পাঠিয়েছেন, যে আপনি কিঞ্চিৎকালের জন্যে রাজপুরী ছেড়ে ঐ পার্কতের দুর্গে গিয়ে থাকুন । আর এ দাসও নরবরের আজ্ঞায় এই রথ এনেছে । তা দেবীর কি আজ্ঞা হয় ?

সখী ! প্রিয়সখি, তুমি যে চুপ্ করে রৈলে ?

পদ্মা ! ( দীর্ঘনিশ্বাস পরিত্যাগ করিয়া ) সখি, আমি এ নগর ছেড়ে কেমন করে যাই ?—

নেপথ্যে ! ( ধনুষ্কার হুকার ধ্বনি ও রণবন্দ্য । )

সখী ! উঃ ! কি ভয়ঙ্কর শব্দ ! সারথি, কৈ, রথ কোথায় ? তুমি আমাদের শীঘ্র নিয়ে চল ।

কলি ! ( স্বগত ) এ হতভাগিনীরও মরণেচ্ছা হলো না কি ? তা যে শিশিরবিন্দু পুষ্পদলে আশ্রয় লয়, সে কি সূর্যের প্রচণ্ড কিরণ হতে কখন রক্ষা পেতে পারে ? ( প্রকাশে ) দেবি, তবে আসুন ।

পদ্মা ! ( স্বগত ) হে আকাশমণ্ডল, তোমাকে লোকে শব্দবাহ বলে । তা তুমি এ দাসীর প্রতি অনুগ্রহ করো আমার এই কথা গুলি আমার জীবিতনাথের কর্ণকুহরে সাবধানে লয়ে যাও । হে রাজন্, তোমার পদ্মাবতী তোমার আজ্ঞা পালন কল্যে ; কিন্তু তার প্রাণটি এ রণক্ষেত্রে তোমার নিকটেই রৈল । দেখ, চাতকিনী বজ্র বিদ্যুত আর প্রবল বায়ু-ক্বেও ভয় না করো, জলধরের প্রসাদ প্রতীক্ষায় কেবল তার সঙ্গেই উড়তে থাকে ।

সখী ! প্রিয়সখি, চল । আমরা যাই ।

পদ্মা ! ( দীর্ঘনিশ্বাস পরিত্যাগ করিয়া ) তবে চল ।

কনি । ( স্বগত ) গরুড় ভূজঙ্গিনীকে ধরে উড়লেন ।

[ সকলের প্রস্থান ।

( রক্তাক্তবস্ত্র পরিধানে ও রক্তার্জসি হস্তে বিদু-  
ষকের প্রবেশ । )

বিদু । ( চতুর্দিক অবলোকন করিয়া স্বগত ) রাম বল,  
বাঁচলেম্ । বেশ পালিয়েছি । আরে, আমি দরিদ্র ব্রাহ্মণ,  
আমার কি এ সকল ভাল লাগে ? তবে করি কি ? দুই ফত্র-  
দলের সঙ্গে কেবল এ পোড়া পেটের জ্বালায় সহবাস কতো  
হয় । তা একটু আদটু সাহস না দেখালে বেটারা নিতান্ত  
হেয় জ্ঞান করবে বল্যে, আমি এই খাঁড়া খানা নিয়ে বেরি-  
য়েছি—যেদ যুদ্ধ কতোই গিয়েছিলেম্ । আর এই যে রক্ত  
দেখ্ছো, এ ত রক্ত নয় । এ—আলতা গোলা । ( উচ্চহাস্য । )  
এই যুদ্ধের কথা শুনে ব্রাহ্মণীর সিদুঁরচুপড়ী থেকে খানকতক  
আলতা চুরি করে টেকে গুঁজে রেখেছিলাম । আর কেন যে  
রেখেছিলেম্ তা সামান্য লোকের বুঝে উঠা দুষ্কর । ওহে,  
যেমন সিংহের অস্ত্র দাঁত, বাঁডের অস্ত্র শিঙ, হাতীর অস্ত্র  
শুঁড়, পাখীর অস্ত্র ঠোঁট আর নখ, ক্ষত্রকুলের অস্ত্র ধনুর্বাণ,  
তেমনি ব্রাহ্মণের অস্ত্র—বিদ্যা আর বুদ্ধি । তা বিদ্যা বিষয়ে  
ত আমার ক অক্ষর গোমাংস ; তবে কিনা একটু বুদ্ধি আছে ।  
আর তা না থাকলে কি এত করে উঠতে পাঠ্যে ? বল দেখি  
আমার কাপড় আর এই খাঁড়া দেখে কে না ভাববে যে আমি  
শত শত হাতী আর ঘোড়া আর যোদ্ধাদেরকে যমের বাড়ী  
পাঠিয়ে এসেছি ; ( উচ্চহাস্য । ) তা দেখি আজ মহারাজ এ  
বেশ দেখে আমাকে কি পুরস্কার করেন ? হে দুই সন্ন্যাসি,

তুমি এসে আমার কাঁধে ভর কর, তা না কল্যে কৰ্ম্ম চলবে না। আজ্ যে আমাকে কত মিথ্যাকথা কইতে হবে তার সংখ্যা নাই।

( কতিপয় নাগরিকের প্রবেশ । )

প্রথম। এই যে আৰ্য্য মানবক এখানে দাঁড়িয়ে রয়েছেন। মহাশয়, প্রণাম করি। ( নিকটবর্তী হইয়া সচকিতে ) ইঃ, এ কি ?

বিদূ। কেন, কি হলো ?

প্রথম। মহাশয়, আপনার সৰ্ব্বাঙ্গে যে রক্ত দেখছি।

বিদূ। দেখবে না কেন ? ওহে, দোল দেখতে গেলে কি গায়ে আবীর লাগে না ?

দ্বিতীয়। তবে মহাশয় রণক্ষেত্রে গিয়েছিলেন নাকি ?

বিদূ। ষাব না কেন ? কি হে, তুমি কি ভেবেছো যে আমি একটা টোলার ভর্ট্চার্য্য—দেড়গজী সমাস ভিন্ন কথা কই না, আর বিচারসভাতেই কেবল দ্রোণাচার্য্যের বীর্য্য দেখাই, কিন্তু একটু মারামারির গন্ধ পেলেই ব্রাহ্মণীর আঁচল ধরে তার পেছন্দিকে গিয়ে লুকুই ! ( উচ্চহাস্য । )

দ্বিতীয়। না, না, তাও কি হয় ? আপনি একজন মহাবীরপুরুষ। তা কি সংবাদ, বলুন দেখি শুনি ?

বিদূ। আর কি সংবাদ ? দেখ, যেমন জমদগ্নির পুত্র ভীষ্ম—

প্রথম। মহাশয়, জমদগ্নির পুত্র ভৃগুরাম।

বিদূ। তাই ত ! তা এ গোলে কি কিছু মনে থাকে হে ? দেখ, যেখন জমদগ্নির পুত্র ভৃগুরাম পৃথিবীকে নিঃস্বত্রিয়া করেছিলেন, এ ব্রাহ্মণও আজ্ তাই করেছে।



নেপথ্যে। ( জয়বাদ্য। )

প্রথম। এই যে মহারাজ, শত্রুদলকে রণস্থলে জয় করে  
ফিরে আস্চ্যে।

নেপথ্যে। ( মহারাজের জয় হুউক। )

তৃতীয়। 'চল হে, রাজ দর্শনে যাওয়া যাউক।

নেপথ্যে। ( বৈতালিকের গীত। )

মাজদুরট—একতারা।

কি রঙ্গ রাজভবনে, কি রঙ্গ আজ্—

করিয়া রণ, শত্রুনিধন, রাজনবর রাজে।

পুলকে সব হইল মগন, উৎসবরত যত পুরজন,

জয় জয় রবপূর্ণ গগন নৌবত ঘন বাজে ॥

সৈন্যসকল সমরকুশল, নিরখি ভীত অরিদলবল,

কম্পিত হয় ধরণীতল, বাশুকি নত লাজে।

ভূপতি অতি বীর্যবান, বিভব নিবহ সুরসমান,

ইন্দ্র যেন শোভমান, মর্ত্যভুবন মাজে ॥

নেপথ্যে। ওরে, একজন দৌড়ে গিয়ে আর্ষ্য মানবকে  
শীত্র ডেকে আনগে তো। মহারাজ তাঁর অশ্বেষণ কচ্যে।

বিদূ। ঐ শোন। দেখি মহারাজ আমাকে আজ্ কি  
শিরোপা দেন্।

[ প্রস্থান। ]

প্রথম। এ ব্রাহ্মণ বেটা কি সামান্য ধূর্ত গা ?

দ্বিতীয়। এমন নির্লজ্জ পুরুষ কি আর পৃথিবীতে ছুটি  
আছে ?

তৃতীয় । তবে ও আলতা গোলা বটে ?

প্রথম । তা বই কি ? ও কি আর যুদ্ধক্ষেত্রে গিয়েছিলো ?

দ্বিতীয় । মহাশয়, চলুন রাজদর্শন করিগে ।

প্রথম । চল ।

[ সকলের প্রস্থান ।

### দ্বিতীয় গর্ভাঙ্ক ।

পরিতর্কিতশিখরস্ব—গহন কানন ।

( কলির প্রবেশ । )

কলি । ( স্বগত ) এইত হরণ করি আনিবু রাণীরে  
এ ঘোর কাননে । এবে কোথায় ইন্দ্রাণী ?  
যে প্রতিজ্ঞা তাঁর কাছে করেছিলু আমি,  
রক্ষা করিয়াছি তাহা পরম কোশলে,—  
( কলির কোশল কভু হয় কি বিফল ? )  
যাই এবে স্বর্গে ( অবলোকন করিয়া )  
অহো ! এই যে পৌলামী  
মুরজার সঙ্গে—

( শচী এবং মুরজার প্রবেশ । )

( প্রকাশে ) দেবি, আশীর্বাদ করি ।

শচী । প্রণাম । •হে দেববর, কি করেছ, বল ?

কলি । পালিবু তোমার আজ্ঞা যতনে, ইন্দ্রাণী,  
বিদায় করছ এবে যাই স্বর্গপুরে ।

শচী । ( ব্যগ্রভাবে ) কোথায় রেখেছ তাকে ?

কলি । এই ঘোরবনে

সখীসহ আনি তারে রেখেছি, মহিষি । (সহাস্রবদনে)

রণে যবে তুলি দৌঁছে উঠিছু আকাশে,

কত যে কাঁদিল ধনী, করিল মিনতি,

সে সকল মনে হলে—হাসি আসে মুখে !

মুর । ( স্বগত ) হেন দুরাচার আর আছে কি জগতে ?

( প্রকাশে ) ভাল, কলিদেব,——

কিছু কি হলো না দয়া তোমার হৃদয়ে ?

কলি । সে কি, দেবি ? হরিণীরে মৃগেন্দ্র কেশরী

ধরে যবে, শুনি তার ক্রন্দনের ধ্বনি,

সদয় হইয়া সে কি ছাড়ি দেয় তারে ?

শচী । কলিদেব,—

শত ধন্যবাদ আমি করি গো তোমারে !

শতকোটি প্রণাম তোমার ও চরণে !

বাঁচালে আমারে তুমি । তোমার প্রসাদে

রহিল আমার মান । অপসরীর দলে

যাহে প্রাণ চাহে তব. পাইবে তাহারে—

পাঠাইব তারে আমি তোমার আলয়ে,

রবিরে প্রদান যথা করয়ে সরসী

নব কমলিনী হাসি—নিশি অবসানে ।

যত রত্নরাজী আছে বৈজয়ন্ত-ধামে

তোমার সে সব । দেখ, আজি হতে শচী—

ত্রিদিবের দেবী—দেব, হলো তব দাসী ।

যাও চলি স্বর্গে এবে । শীত্র আসি আমি

যথোচিত পুরস্কারে তুষিব তোমারে ।

কলি । যে আজ্ঞা ! বিদায় তবে হই আমি, সতি ।

[ প্রস্থান ।

মুর । সখি, আমাদের কি এ ভালকর্ম হলো ?

শচী । কেন ? মন্দ কর্মই বা কি ?

মুর । দেখ, আমরা পরের অপরাধে এ সরলা মেয়েটাকে যাতনা দিতে প্ররুত হলোয় ।

শচী । আঃ, আর মিছে বকো কেন ? তোমাকে আমি না হবতো প্রায় একশত বার বলেছি যে স্বয়ং সৃষ্টিকর্তা বিধাতা দুর্ভদমন কর্ণবার জন্যে সময় বিশেষে ভগবতী বহুমতীকেও জলমগ্ন করেন । তা ভগবতী বহুধরা কি স্বদোষে সে বস্ত্রণা ভোগ করেন ?

মুর । তা আমি কেমন করো বলবো ? ( চতুর্দিক্ অবলোকন করিয়া ) । একবার ঐ দিকে চেয়ে দেখ দেখি, সখি ।

শচী । কি ?

মুর । সখি, ঐ পার্বতশৃঙ্গের অন্তরাল থেকে এ দিকে কে আস্চে দেখ তো ? আহা ! একি ভগবতী ভাগীরথী হরিদ্বার হতে বের্চেয় ? এমন অপরূপ রূপ লাভ্য ত আমি কোথাও দেখি নাই ।

শচী । ঐ সেই পদ্মাবতী ।

মুর । সখি, ওর মুখখানি দেখলে বোধ হয় যেন আমি ওকে আরও কোথাও দেখেছি । ( স্বগত ) একি ? আমার স্তনদ্বয় যে সহসা দুধে পরিপূর্ণ হলো ? হে হৃদয়, তুমি এত চঞ্চল হলো কেন ?

শচী । সখি, চল আমরা পুনরায় কলিদেবের নিকটে যাই ।

শচী । চল না কেন ? আমার মনস্কামনা এখন সম্পূর্ণ-  
রূপে সফল হয় নাই ।

মুর । সখি, আমার মন কলিদেবের নিকটে আর কোন  
মতেই যেতে চায় না । আমি অলকায় চল্যাম্ ।

[ প্রস্থান ।

শচী । ( স্বগত ) তুমি গেলেই বা ! তোমার দ্বারা যত  
উপকার হতো পার্বে, তা আমি বিশেষরূপে জানি । তা  
যাই—আমি একলাই কলিদেবের নিকটে যাই । ইন্দ্রনীল যেন  
স্বয়ম্বরসংগ্রামে হত হয়েছে, এইরূপ একটা মিথ্যাঘোষণা  
রটিয়ে দিলে আরও ভাল হবে ।

[ প্রস্থান ।

( পদ্মাবতীর প্রবেশ । )

পদ্মা । ( স্বগত ) হায় ! এ বিপজ্জ্বাল হতে আমাকে কে  
রক্ষা করবে । এ কি কোন দেব, না দেবী, এ হতভাগিনীর  
প্রতি বাম হয়ে একে এত যন্ত্রণা দিতে প্রবৃত্ত হল্যেন্ । ( চতু-  
র্দিক অবলোকন করিয়া ) কি ভয়ঙ্কর স্থান ! বোধ হয় যেন  
যামিনীদেবী 'দিবাভাগে এই নিভৃতস্থলেই বিরাজ করেন্ ।  
( দীর্ঘনিশ্বাস পরিত্যাগ করিয়া ) হে প্রাণেশ্বর, যেমন রঘুনাথ  
ভগুবতী জানকীকে বিনা দোষে বনবাস দিয়েছিলেন, আপনিও  
কি এ দাসীর প্রতি প্রতিকূল হয়ে তুলি কল্যেন্ । হে জীবিতেশ-  
্বর, আপনি যে আমাকে পৃথিবীর সুখভোগে নিরাশ কল্যেন্,  
তাতে আমার কিছুই মনোবেদনা হয়না, তবে যাবজ্জীবন  
আমার এই একটা দুঃখ রৈলো, যে আপনাকে আমি বিপদ-  
সাগর থেকে উত্তীর্ণ হতে দেখতে পেল্যেন্ না । ( রোদন । )

হায় ! আমার কি হবে ? আমাকে কে রক্ষা করবে ? (পরি-  
ক্রমণ ও পর্কতের প্রতি লক্ষ্য করিয়া ) হে গিরিবর, এ অনাথা  
আপনার নিকট আশ্রয় চায়, তা আপনার কি আজ্ঞা হয় ?  
( চিন্তা করিয়া ) আপনি যে নিস্তর হইয়া রৈলেন ? তা থাকবেন  
বৈ আর কি ? হে নগরাজ, এ পৃথিবীতে যে ব্যক্তি মহান্ হয়,  
তার ক্ষুদ্রলোকে প্রতি এইরূপই ব্যবহার বটে । আপনি  
সিংহের নিনাদ শুনে তৎক্ষণাৎ তার প্রত্যুত্তর দেন,—মেঘের  
গর্জনে পুনর্গর্জন করেন,—বজ্রের শব্দে অস্থির হয়ে হুঙ্কার  
ধ্বনি করেন ;—আমি অবলা মানবী, তা আপনি আমার প্রতি  
রূপাদৃষ্টি করবেন কেন ? (রোদন ।) কি আশ্চর্য্য ! এ এমনি গহন  
বন, যে এখানে আমার আপনার শব্দ শুনেও ভয় হয় । হায় !  
আমি এখন কোথায় যাব ? বসুমতী যে এখনও আস্চে না ।

( কদলীপত্রে জল লইয়া সখীর প্রবেশ । )

সখী । প্রিয়সখি, এই নাও । আঃ ! এ জলের অবেষণে  
যে আমি কত দূর ঘুরেছি তার আর কি বলবো ?

পদ্মা । ( জলপান করিয়া ) সখি, আমি তোমাকে বৃথা  
ক্লেশ দিলেম্ বৈ ত নয় । হায় ! এ জলে কি এ পাপপ্রাণের  
তৃষ্ণা দূর হবে ? ( রোদন । )

সখী । প্রিয়সখি, এ পর্কতপ্রদেশ কি ভয়ঙ্কর স্থান !

পদ্মা । কেন ? কেন ?

সখী । উঃ ! আমি যে কত সিংহ, কত বাঘ, কত মহিষ,  
কত ভালুক, আর কত যে বরাহের পায়ে চিহ্ন দেখেছি, তা  
মনে হলে বুক্ শুকিয়ে উঠে ! প্রিয়সখি, এ ঘোর গহন বনে  
আমাদের আর কে রক্ষা করবে ! ( রোদন । )

পদ্মা । ( সখীর হস্ত ধারণ করিয়া ) সখি, আমি যে প্রাণ-নাথের নিকট কি অপরাধ করেছি, তা আমার এখনও স্মরণ হচে না । কিন্তু তিনি কি আমার প্রতি একেবারে এত নির্দয় হলেন, যে এ হতভাগিনীকে যারা ভালবাসে, তাদের উপরও তাঁর রাগ হলো ? ( রোদন । )

সখী । প্রিয়সখি, তুমি আমার জন্যে কেঁদো না ।

পদ্মা । সখি, তুমিও কি আমার দোষে মারা পড়বে ? ( রোদন । )

সখী । ( সজল নয়নে পদ্মাবতীকে আলিঙ্গন করিয়া ) প্রিয়সখি, আমি কি তোমার জন্যে মরতে ডরাই ! আমি যদি আমার প্রাণ দিয়ে তোমাকে এ বিপজ্জ্বাল হত্যে উদ্ধার কতে পারি, তবে আমি তা এখনই দিতে প্রস্তুত আছি । ( রোদন । )

পদ্মা । ( দীর্ঘনিশ্বাস পরিত্যাগ করিয়া ) হে বিধাতঃ, তুমি যদি এ তরণীকে অকুল সমুদ্রমধ্যে মগ্ন করবার নিমিত্তেই নির্মাণ করেছিলে, তবে তুমি একে জনপূর্ণ করে ভাসালে কেন ? ( রোদন । )

সখী । প্রিয়সখি, তুমি আমার জন্যে কেঁদো না । ( রোদন । )

পদ্মা । সখি, এসো, আমরা এখানে বসি । আমাদের কপালে যদি মরণ থাকে, তবে আমরা একত্রই মরবো । ( শিলা-তলে উভয়ের উপবেশন । )

সখী । প্রিয়সখি, এ দুই সারথি যে আমাদের সঙ্গে এমন অসৎ ব্যবহার করবে, তা আমি স্বপ্নেও জানতেম্ না ।

পদ্মা । ( দীর্ঘনিশ্বাস পরিত্যাগ করিয়া ) সখি, তাঁর দোষ কি ? সে এক জন ভৃত্য বই ত নয় ।

নেপথ্যে । রে অবোধ প্রাণ ! তুই যদি এ ভগ্ন কারাগার  
স্বরূপ দেহ রণভূমিতেই পরিত্যাগ করিস্, তা হলে ত তোকে  
আর এ যন্ত্রণা সহ্য কত্যা হতো না ! হায় !—

পদ্মা । ( সত্রাসে ) একি ? ( উভয়ের গাত্রোঞ্ছান । )

সখী । ( নেপথ্যাভিমুখে অবলোকন করিয়া সত্রাসে )  
তাই ত প্রিয়সখি, বোধ করি, এ কোন মায়াবী রাক্ষস হবে !  
হে জগদীশ্বর, আমাদের এখন কে রক্ষা করবে ?

( ক্ষতযোদ্ধার বেশে কলির পুনঃপ্রবেশ । )

কলি । আপনারা দেবকন্যাই হউন্ কি \*মানবীই হউন্,  
আমার এ স্থলে সহসা প্রবেশে বিরক্ত হবেন না । হায় !  
যেমন হস্তী সিংহের প্রচণ্ড আঘাতে ব্যথিত হয়ে কোন পার্বত-  
গহ্বরে ত্রাসে পলায়ন করে, আমিও তদ্রূপ এই স্থলে এসে  
উপস্থিত হলেম্ ।

সখী । ( ব্যগ্রভাবে ) কেন ? আপনার কি হয়েছে ?

কলি । আমি বীরচূড়ামণি রাজা ইন্দ্রনীলের এক জন্ম-  
যোদ্ধা । তাঁর শত্রুদলের সঙ্গে ঘোরতর সমর করে এই দুঃ-  
বস্থায় পড়েছি ।

পদ্মা । ( ব্যগ্রভাবে ) মহাশয়, রণক্ষেত্রের সংবাদ কি ?

কলি । ( দীর্ঘনিশ্বাস পরিত্যাগ করিয়া ) হায় ! দেবি,  
আপনি ও কথা আর আমাকে কেন জিজ্ঞাসা করেন ? প্রবল  
শত্রুদল মহারাজকে সঠিসনে নিপাত করে, \*বিদর্ভনগরীকে  
ভস্মরাশি করেছে ।

পদ্মা ।\* অ্যা ! আপনি কি বল্যেন ?

সখী । এ কি ? প্রিয়সখী যে সহসা পাণ্ডুবর্ণা হয়ে উঠলেন ?



পদ্মা । ( অচেতন হইয়া ভূতলে পতন । )

সখী । ( পদ্মাবতীকে ক্রোড়ে ধারণ করিয়া ) হায় ! প্রিয়-  
সখী যে অচেতন হয়ে পড়লেন ! মহাশয়, ঐ পার্কতশৃঙ্গের  
ঐ দিকে একটা নির্ঝর আছে, আপনি অনুগ্রহ কর্যে ওখান-  
থেকে একটু জল আনলে বড় উপকার হয় । ইনি একজন  
সামান্য স্ত্রী নন ! ইনি রাজমহিষী পদ্মাবতী ।

কলি । ( স্বগত ) যেমন কালসর্প আপন শত্রুকে দংশন  
কর্যে বিবরে প্রবেশ করে, আমিও তদ্রূপ আপন অভীষ্ট-  
সিদ্ধি করে স্বস্থানে প্রস্থান করি । ( প্রকাশে ) এই আমি  
চল্লেম ।

[ প্রস্থান ।

সখী । ( স্বগত ) হায়, এ কি হলো ? ( আকাশে কোমল  
বাদ্য । ) এ কি ?

আকাশে । ( গীত )

[ লুম-যৎ । ]

আর কি কব তোমারে ?

বেজন পীরিতে রত, সুখ দুঃখ সহে কত

পরেরি তরে ।

সুধাকর প্রেমাধিনী, অতি সুখী চকোরিণী ;

কভু হয় বিবাদিনী, বিরহ শরে !

নলিনী ভানুর বশে, মগন প্রণয়-রসে,

তথাপি কখন ভাসে, বিবাদ নীরে ।

প্রেম সমভাব নহে, কভু সুখভোগে রহে,

কভু বা বিরহ দহে, নয়ন ঝরে ॥

( কাষ্ঠচ্ছেদিকা বেশে রতিদেবীর প্রবেশ । )

রতি । ( স্বগত ) হায় ! দেবকুলে শচীর মতন্ চণ্ডালিনী  
কি আর আছে ? আহা ! সে যে দুষ্ক কলির সহকারে রাজ-  
মহিষী পদ্মাবতীকে কত ক্লেশ দিতে আরম্ভ করেছে, তা মনে  
হলে হৃদয় বিদীর্ণ হয় । তা আমার এখন কি করা উচিত ?  
( চিন্তা করিয়া ) এই চিত্রকূট পৰ্ব্বতের নিকটে তমসা নদীতীরে  
অনেক মহর্ষিরা সপরিবারে বাস করেন, তা পদ্মাবতী আর  
বহুমতীকে কোন মুনির আশ্রমে লয়ে যাওয়াই উচিত । তার  
পরে আমি কৈলাসপুরীতে ভগবতী পার্বতীর নিকটে এ সকল  
বৃত্তান্ত নিবেদন করবো । তিনি এ বিষয়ে মনোযোগ কল্যে  
আর কোন ভয়ই থাকবে না । যে দেশ গঙ্গাদেবীর স্পর্শে  
পবিত্র হয়েছে, সে দেশে কি কেউ তৃষ্ণাপীড়া ভোগ করে ?  
( অগ্রসর হইয়া প্রকাশে ) ও গো, তোমরা কারা গো ?

সখী । তুমি কে ?

রতি । আমি এই পৰ্ব্বতে কাট্ কুড়ুতে এসেছি, তোমরা  
এখানে কি কচ্যো ?

সখী । দেখ, আমার প্রিয়সখী অচেতন হয়ে রয়েছেন, তা  
তুমি একটু জল এনে দিতে পার ?

রতি । অচেতন হয়েছেন ? তা জলে কাজ কি ? আমি  
ওঁকে এখনই ভাল করে দিচ্ছি । ( পদ্মাবতীর গাত্রে হস্ত  
প্রদান । )

পদ্মা । ( চেতন পাইয়া দীর্ঘনিশ্বাস পরিত্যাগ । )

রতি । দেখ, এই তোমার সখী চেতন পেলেন ।

পদ্মা । ( গাত্রোখান করিয়া ) সখি, আমি যে এক অদ্ভুত  
স্বপ্ন দেখেছি তার কথা আর কি বলবো ?

সখী ! প্রিয়সখী, কি স্বপ্ন ?

পদ্মা ! আমার বোধ হলো। যেন একটি পরমহুন্দরী দেব-কন্যা আমার মস্তকে তাঁর পদ্মহস্ত বুলিয়ে বলেন, বৎসে, তুমি শাস্ত হও। তোমার প্রাণনাথের সঙ্গে শীঘ্রই তোমার মিলন হবে। ( রতিকে অবলোকন করিয়া সখীর প্রতি ) সখি, এ স্ত্রীলোকটি কে ?

সখী ! প্রিয়সখি, এ এক জন কাটুরিয়াদের মেয়ে।

রতি ! হ্যাঁ গা, তোমাদের কি এখানে থাকতে ভয় হয় না ?

পদ্মা ! কেন ?

রতি ! এ পাহাড়ে যে কত সিংহ, কত বাঘ, কত ভালুক, আর কত যে সাপ থাকে, তা কি তোমরা জান না ?

সখী ! ( সত্রাসে ) কি সর্সনাশ ! এ পাহাড়ের নাম কি গা !

রতি ! এর নাম চিত্রকূট।

পদ্মা ! এখান থেকে বিদর্ভনগর কত দূর, তা তুমি জান !

রতি ! বিদর্ভনগর এখান থেকে অনেক দিনের পথ।  
কেন, তোমরা কি সেখানে যেতে চাও ?

পদ্মা ! ( স্বগত ) হায় ! সে বিদর্ভনগর কি আর আছে !  
হে প্রাণেশ্বর, তুমি এ হতভাগিনীকে কেন সঙ্গে করো নিলে  
না ? ( রোদন )

রতি ! ( সখীর প্রতি ) তোমার প্রিয়সখী কাদেন কেন ?  
ওঁর যদি এখানে থাকতে ভয় হয়, তবে তোমরা আমার সঙ্গে  
এসো।

সখী ! তুমি আমাদের কোথায় নিয়ে যাবে ?

রতি ! এই পাহাড়ের কাছে অনেক তপস্বীরা বসতি করেন,

তা তাঁদের কারো আশ্রমে গেলে তোমাদের আর কোন ক্লেশই থাকবে না ।

সখী । ( পদ্মাবতীর প্রতি ) প্রিয়সখি, তুমি কি বল ? আমার বিবেচনায় এখানে আর এক মুহূর্তের জন্যেও থাকা উচিত হয় না ।

পদ্মা । সখি, তোমার যা ইচ্ছা ।

সখী । তবে চল । ওগো কাটুরেদের মেয়ে, তুমি আমাদের পথ দেখিয়ে দাও স্ত ?

[ সকলের প্রস্থান ।

### তৃতীয় গর্তাঙ্ক ।

বিদর্ভনগরস্থ—রাজগৃহ ।

( রাজা ইন্দ্রনীল স্নান ও মৌনভাবে আসীন, মন্ত্রী । )

মন্ত্রী । ( স্বগত ) প্রায় সপ্তাহ হলো রাজ্ঞী পদ্মাবতী সখী বসুমতীর সহিত রাজপুরী পরি ত্যাগ করে যে কোথায় গেছেন তার কোন অনুসন্ধানই পাওয়া যাচ্ছে না । ( দীর্ঘনিশ্বাস পরি-  
ত্যাগ করিয়া ) আহ ! ( মহীপাল অধুনা রাজমহিষীর প্রাপ্তি বিষয়ে প্রায় নিরাশ্বাস হয়ে নিরাহারে এবং অনিদ্রায় দিন-  
যামিনী যাপন করেন ; আর আপনার নিত্যকার্যের প্রতি তিলান্বয়ের নিমিত্তেও মনোযোগ করেন না । হায় ! মহা-  
রাজের দুর্দশা দেখলে জ্বদয় বিদীর্ণ হয় । হে বিধাতঃ ! তোমার এ কি সামান্য বিড়ম্বনা ! তুমি কি এ দয়্যাসিন্ধুকেও বাড়বানলে তাপিত কল্যে—এ কম্পতরুকেও দাবানলে দগ্ধ কল্যে,—এ প্রতাপশালী আদিত্যকেও দুষ্টি রাহুর গ্রাসে

নিক্কিণ্ড কল্যে? ( চিন্তা করিয়া ) তা আমার আর এ স্থলে  
অপেক্ষা করবার কোন প্রয়োজন নাই। প্রায় ছুই দশাবধি  
আমি এস্থলে দণ্ডায়মান আছি, কিন্তু মহারাজ আমার প্রতি  
একবার দৃকপাতও কল্যেন না। ( নেপথ্যাভিমুখে অবলোকন  
করিয়া ) এই যে আৰ্য্য মানবক এ দিকে আগমন কচ্যেন।  
তা দেখি ঐর দ্বারা কোন উপকার হতে পড়বে কি না।

( বিদূষকের প্রবেশ। )

বিদূ। ( মস্তকীপ্রতি ) মহাশয়, আপনি অনুগ্রহ করে  
এখান থেকে ক্লিকিৎকালের জন্যে প্রস্থান করুন। দেখি,  
আমি মহারাজের এ মৌনব্রত ভঙ্গ কত্যা পারি কি না।

মস্তকী। যে আজ্ঞা, তবে আমি যাই।

[ প্রস্থান। ]

বিদূ। ( স্বগত ) হায়! প্রিয় বয়স্যের এ ছুরবস্থা দেখে আর  
এক মুহূর্তের জন্যেও বাঁচতে ইচ্ছা করে না। হাঁ রে দারুণ  
বিধি, তোর মনে কি এই ছিল? ( চিন্তা করিয়া ) প্রিয় বয়স্যের  
সঙ্গীতে চিরকাল অনুরাগ, আর না হবেই বা কেন? ঋতুরাজ  
বসন্তই কোকিলকে সমাদর করেন। এই জন্যে আমি রাজ-  
মহিষীর কয়েক জন সুগায়িকা সহচরীকে এখানে এনেচি।  
দেখি, এদের সুস্বরে প্রিয় বয়স্যের চিত্তবিনোদ হয় কি না?  
( নেপথ্যাভিমুখে জনাস্তিকে ) কেমন নিপুণিকে, তোমরা সকলে  
ত প্রস্তুত হয়েছো? ( কর্ণদিয়া ) ভাল! তবে আরম্ভ কর দেখি?  
নেপাথে। ( বহুবিধ যন্ত্রের মৃদুধ্বনি। )

বিদূ। ( নেপথ্যাভিমুখে জনাস্তিকে ) আহা! কি মনো-  
হর ধ্বনি! তা এখন একটা গান গাও দেখি?

নেপথ্যে ।

( গীত )

[ বারঙা—চুংরী । ]

পিরীতি পরম রতন্ ।

বিরহে পারে কি কভু হরিতে সে ধন্ ।  
কমলে কণ্টক থাকে, তবু ভাল বাসে লোকে,  
কে তা'জে বিচ্ছেদ দেখে, প্রেম আকিঞ্চন ।  
মিলন বিচ্ছেদ পরে, দ্বিগুণ সুখের তরে,  
যথা অমানিশান্তরে শশীর শোভন ॥

রাজা । ( দীর্ঘনিশ্বাস পরিত্যাগ করিয়া ) সখে মানবক—  
বিদু । ( সহর্ষে ) মহারাজের জয় হউক !

রাজা । ( গাত্ৰোদ্ধান করিয়া ) সখে, যে কুসুমকানন দাবা-  
নলে দধ্ব হয়ে গেছে, তাতে জল সেচন করা বৃথা পরিশ্রম বৈ  
ত নয় ।

বিদু । বয়স্য, বিধাতা না করেন্ যে এমন সুকুম-কাননে  
দাবানল প্রবেশ করে ।

রাজা । সে বা হৌক, সখে, তুমি আমাকে চিরবাধিত  
কল্যে । দেখ, আগ্নেয়গিরির উপরে মেঘদল বারি বর্ষণ কল্যে  
যদ্যপিও তার অন্তরিত ছত্ৰাশন নির্মাণ না হয়, তত্রাচ তার  
অঙ্গের জ্বালার অনেক হ্রাস হয় । তুমি আমার মনোরঞ্জনের  
নিমিত্তে কি না কচ্যো ?

বিদু । বয়স্য, সঙ্গার উথলিত হল্যে যে কত জীবের  
জীবন সংশয় হয়, তা কি আপনি জানেন্ না ? তা আপনি  
একটু স্নিহ্বির হল্যে আমরা সকলেই পরম সুখলাভ করি ।

রাজা । ( দীর্ঘনিশ্বাস পরিত্যাগ করিয়া ) সখে, এমন

প্রবল ঋড় বইতে আরম্ভ কল্যে, কি সাগর স্থির হয়ে থাকতে পারে? দেখ, যে শোকশেলে দেবদেব-মহাদেব, এবং স্বয়ং বিষ্ণু-অবতার রমুপস্থিতও ব্যথিত হয়েছিলেন, তার প্রচণ্ড আঘাতে আমি অতি ক্ষুদ্র মানব কি প্রকারে স্থির হতে পারি? (চিন্তা ও দীর্ঘনিশ্বাস পরিত্যাগ করিয়া) হে বিধাতঃ! তোমার কি কিছুমাত্র বিবেচনা নাই? যে হলাহল স্বয়ং নীলকণ্ঠের দেহ দাহন করেছিল, তাই তুমি আমাকে পান করালে?

বিদূ। (স্বগত) আহা! প্রিয় বয়স্যের খেদোক্তি শুন্লে বুক ফেটে যায়! হাঁয় রে নিষ্ঠুর বিধি! তোর মনে কি এই ছিল?

রাজা। কি আশ্চর্য্য! সখে, এ সুবর্ণ লতাটি যে আমার হৃদয়ভূমি থেকে কোন্ নিশাচর চুরি করে নিয়ে গেলো, এ সংবাদ কি কেউ আমাকে দিতে পারে না? হে পক্ষিরাজ জটায়ু, তোমার তুল্য পরোপকারী কি বিহঙ্গমকুলে আর এখন কেউ নাই? হায়! (মূর্ছা প্রাপ্তি।)

বিদূ। কি সর্বনাশ! কি সর্বনাশ! (উচ্চস্বরে) ওরে এখানে কে আছিস রে? একবার শীত্র করে এ দিকে আয় তো।

(বেগে মন্ত্রীর পুনঃপ্রবেশ।)

মন্ত্রী। এ কি?

বিদূ। মহাশয়, আর কি বলবো? এই চক্ষু দেখুন।

মন্ত্রী। (সজল নয়নে) হে রাজকুলশেখর, এই কি তোমার উপযুক্ত শয্যা! আর্ষ্য মাগবক, এ কি আশ্চর্য্য ব্যাপার! প্রজাদলের স্নেহস্বরূপ পরিখায় পরিবেষ্টিত এ রাজসগরে এ দুর্জয় শত্রু কি প্রকারে প্রবেশ কল্যে? হে নরশ্রেষ্ঠ, হে বীর-

কেশরি, যে অকুল সাগর ভগবতী বনুমতীকে আপন অর্পাল-  
ঙ্গনপাশে আবদ্ধ করে রেখেছিলেন, তিনি কি এতদিনে তাঁকে  
পরিভ্যাগ কল্যেন্ । হায় ! হায় ! এ কি দুর্কিঁপাক্ ।

বিদূ । মহাশয়, আম্বন, মহারাজকে স্থানান্তরে লয়ে  
যাওয়া যাক্ ।

মন্ত্রী । যে অঞ্জা । চলুন ।

[ উভয়ের রাজাকে লইয়া প্রস্থান ।

ইতি চতুর্থাঙ্ক ।

---



## পঞ্চমাস্ক ।



### প্রথম গর্ভাস্ক ।



শক্রাবতারাত্যন্তরে—শচীতীর্থে ।

( শচীর প্রবেশ । )

শচী । ( স্বগত ) আমি বসন্তকালে এই তীর্থের নির্মূল  
জলে গাত্র প্রক্ষালন করি, আর এই নিকুঞ্জে যে সকল ফুল  
ফোটে তা দিয়া কুস্তুল সাজিয়ে দেবেজের শয়নমন্দিরে যাই,  
—এই নিমিত্তেই লোকে এ সরোবরকে শচীতীর্থ বলে । এই  
জলে অবগাহন কল্যে বামাকুলের যৌবন চিরস্থায়ী হয়, আর  
তাদের অঙ্গের রূপলাবণ্য রসানে মার্জিত হেমকান্তির মতন  
শতগুণ বৃদ্ধি হয় । ( চতুর্দিক অবলোকন ) আহা, ঋতুরাজ  
বসন্তের সমাগমে এ কাননের কি অপূর্ব শোভাই হয়েছে !

নেপথ্যে ।

( গীত )

[ বাহারভৈবনী—৫৫ । ]

মধুর বসন্ত আগমনে,  
মধুপ ঙ্গরে সঘনে,  
করি মধুপান সুখে ফুলকাননে ।  
কত পিকবরে,  
পঞ্চম কুহরে,  
মনোহর সে ধনি শ্রবণে ।

উপবন ষত,  
 সৌরভ রসিত,  
 সতত মলয় সমীরণে ॥  
 সুখের কারণ,  
 বসন্ত যেমন,  
 না হেরি এমন ত্রিভুবনে ॥  
 রতিপতি রসে,  
 মোদিত হরষে,  
 যুবক যুবতী স্মিলনে ॥

শচী । আমার সহচরী অপ্সরীরা ঐ তরুণে সুখে গান  
 কচে । এ মধুকালে কার মন আনন্দ-সাগরে মগ্ন না হয় ?  
 ( পরিক্রমণ করিয়া ) সে যা হোক, এত দিনের পর দুই ইন্দ্র-  
 নীল সর্ষপ্ৰকারেই সমুচিত দণ্ড পেলে । কি আক্সাদের বিষয় !  
 কয়েক মাস হলো আমি কলিদেবের সহকারে তার মহিষী  
 পদ্মাবতীকে রাজপুরী হতে অপহরণ করে বনবাস দিয়েছি ।  
 এখন ইন্দ্রনীল কাস্তুর বিরহে শোকাক্ত হয়ে আপন রাজ্য  
 পরিত্যাগ করেছে, আর উদাসভাবে দেশদেশান্তর ভ্রমণ  
 কচে । ( সরোষে ) আঃ পাবও দুরাচার ! তুই শৃগাল হয়ে  
 সিংহীর সঙ্গে বিবাদ করিস্ । তা তুই এখন আপন কুকর্মের  
 ফল বিলক্ষণ করে ভোগ কর্ । তোকে আর এখন কে রক্ষা  
 করবে ?

( পুষ্পপাত্র হস্তে রক্তার প্রবেশ । )

রক্তা । দেবি, এই মালা ছড়াটা একবার গলায় দেন্ দেখি ?

শচী । কৈ ? দে দেখি । ( পুষ্পমালা গ্রহণ করিয়া )  
বাঃ ! বেশ গেঁথেছি । তা তোর এত বিলম্ব হলো কেন ?

রস্তা । ( সহাস্যবদনে ) দেবি, আজ্বে আমি কতশত  
শত্ৰুকে সমরে হারিয়ে এসেছি, তা শুন্লে আপনি অবাক  
হবেন ।

শচী । সে কি লো ?

রস্তা । ( সহাস্যবদনে ) যখন আমি এই সকল ফুল তুলতে  
আরম্ভ কল্যেম, তখন যে কত অলি সরোষে এসে আমার  
চাঁরদিকে গুণগুণ কতো লাগলো, তা আর আপনাকে কি  
বলবো । দুই দৈত্যকুল এই রূপেই শংখধ্বনি করয়ে স্বর্গপুরী  
ঘেরে ।

শচী । ( সহাস্যবদনে ) তা তুই কি করলি ?

রস্তা । আর কি করবো ? আমি তখন আমার একাবলীর  
আঁচল নেড়ে এমন্ পবন বাণ ছাড়লেম; যে বীরবরেরা সকলেই  
যুদ্ধে বিমুখ হয়ে বেগে পালালেন ।

( ক্রন্দন করিতে করিতে মুরজার প্রবেশ । )

শচী । ( ব্যগ্রভাবে ) সখি যক্ষেশ্বর, এ কি ?

মুর । শচীদেবি, তুমিই আমার সর্বনাশ করেছো !

শচী । কেন ? কেন ? কি করেছি ?

মুর । আর কি না করেছো ? ( রোদন ) হায় ! হায় !  
বাছা ! আমি কি পৃথিবীর মতন নিষ্ঠুর হয়ে থাকে পর্ভে ধরে  
ছিলেম্ তাকেই আবার গ্রাস কল্যেম্ । আমি সিংহী আর  
বাঘিনী অপেক্ষাও মমতাহীন হল্যেম্ । হে বিধাতঃ, এ কি  
তোমার সামান্য লীলাখেলা ! ( রোদন ) হায় ! এমন কৰ্ম  
মা হয়ে কে কোথায় করেছে ? ( রোদন । )

শচী । সখি, বৃত্তান্তটা কি তা তুমি আমাকে ভাল করেই বল না কেন ?

মুর । সখি, আর বলবো কি ? ইন্দ্রনীরলের মহিষী পদ্মাবতীই আমার বিজয়া । ( রোদন । )

শচী । বল কি ? তা এ কথা তোমাকে কে বললে ?

মুর । আর কে বলবে ? স্বয়ং ভগবতী বসুমতীই বলেছেন । ( রোদন । )

শচী । সখি, তুমি না কেঁদে বরং এ সকল কথা আমাকে খুলে বল । ভাল, যদি পদ্মাবতীই তোমার বিজয়া হবে, তবে মাহেশ্বরী পুরীর রাজা যজ্ঞসেন তাকে কোথ থেকে পোলে ?

মুর । ( দীর্ঘনিশ্বাস পরিত্যাগ করিয়া ) ভগবতী বসুমতী বিজয়াকে প্রসব করে শ্রীপর্কতের উপর কমলকাননে রেখেছিলেন, পরে রাজা যজ্ঞসেন ঐ স্থলে যুগয়া কভ্যে গিয়ে, তাকে পেয়ে আপনার পাটেশ্বরীর হাতে লালন পালনের জন্যে দিয়েছিল । হায় ! হায় ! বাছা, চিত্রকূটপর্কতের উপর তোমার চন্দ্রানন দেখে আমার স্তনদ্বয় ছুঁতে পারি পূর্ণ হযেছিল, তা আমি তোমাকে ভাতেও চিন্লেম্ না ? ( রোদন । )

শচী । সখি, তুমি শাস্ত হও ।

আকাশে । ( বীণাধ্বনি । )

শচী । এ কি ? ( আকাশমার্গে দৃষ্টিপাত করিয়া ) এই যে দেবর্ষি নারদ এই দিকে আসছেন । সখি, তুমি সাবধান হও, এই ধূর্ত ত্রাসাণই এ বিপদের মূল ; দেখো—ও যেন আবার কন্দল বাধাতে না পারে ।

( নারদের প্রবেশ । )

উভয়ে । ভগবন, আমরা আপনাকে অভিবাদন করি ।

নার । আপনাদের কল্যাণ হউক ।

শচী । দেবর্ষি, সংবাদ কি? আজ্ঞা করুন দেখি ?

নার । দেবি, সকলই সুসংবাদ । ভগবতী পার্বতী আমাকে  
অদ্য আপনাদের সমীপে প্রেরণ করেছেন ।

শচী । কেন ? ভগবতীর কি আজ্ঞা ?

নার । তিনি শুনেছেন যে আপনারা নাকি বিদর্ভনগরের  
রাজা পরম শিবভক্ত ইন্দ্রনীলরায়কে কলিদেবের সাহায্যে  
বান্ধা ক্লেশ দিতে প্রবৃত্ত হয়েছেন ।—

শচী । ভগবনু, তা ভগবতী পার্বতীকে এ কথা কে বললে ?

নার । ভগবতী এ কথা রতিদেবীর মুখেই শ্রবণ করেছেন ।

শচী । ( স্বগত ) কি সর্বনাশ ! এ ছুষ্ঠা রতির কি কিছু-  
মাত্র লজ্জা নাই ? এমন কথাও কি মহেশ্বরীর কর্ণগোচর করা  
উচিত ? ( প্রকাশে ) দেবর্ষি, তা ভগবতী এ কথা শুনে কি  
আদেশ করেছেন ?

নার । ভগবতীর এই ইচ্ছা যে আপনারা এ বিষয়ে ক্ষান্ত  
হইয়েন ।

শচী । ভাল, তা যেন হলেয়ম্ । কিন্তু এখন পদ্মাবতীই  
বা কোথায়, আর ইন্দ্রনীলই বা কোথায়—তা কে জানে ?

নার । ( সহাস্যবদনে ) তন্নিমিত্তে আপনি চিন্তিত হবেন  
না । রাজমহিষী পদ্মাবতী এক্ষণে তমসানদীতীরে মহর্ষি  
অঙ্গিরার আশ্রমে বাস কচ্যেৎ ।

শচী । ( স্বগত ) হায় ! আমার এত পরিশ্রম কি তবে  
বৃথা হলো ? আর অবশেষে রতিই জিতলে ! তা করি কি ?  
ভগবতী গিরিজার আজ্ঞা উল্লঙ্ঘন করা কার সাধ্য । শ্রোত-  
স্বতীর পথ রুদ্ধ কত্যা কে পারে ?

নার । আমি মহাদেবীর আজ্ঞানুসারে যতীন্দ্র অঙ্গিরার আশ্রমে গমন কল্পে আকাঙ্ক্ষা করি, অতএব আপনারা আমাকে এক্ষণে বিদায় করুন ।

মুর । ভগবন্, আপনি আমাকে সেখানে সঙ্গে লয়ে চলুন !

শচী । চলুন, আমিও আপনাদের সঙ্গে যাই । ( রস্তার প্রতি ) রস্তা, তুই এখন অমরাবতীতে যা । আমি একবার যোগীবর অঙ্গিরার আশ্রম থেকে আসি ।

রস্তা । যে আজ্ঞা ।

[ নারদ, শচী, এবং মুরঞ্জার প্রস্থান ।

আমি আর এখানে একলা থেকে কি করবো ? যাই, দেখিগে নন্দনকাননে এখন কি হচেয ।

[ প্রস্থান ।

## দ্বিতীয় গর্ভাঙ্ক ।

তমসানদীতীরে মহর্ষি অঙ্গিরার আশ্রম ।

( পদ্মাবতী এবং গৌতমীর প্রবেশ । )

গৌতম । বৎসে, তুমি এত অধীরা হইও না ! তোমার প্রাণেশ্বর অতি স্বরায়ই তোমার নিকটে আসবেন, তার কোন সন্দেহ নাই । ভগবান অঙ্গিরা তোমার এ প্রতিকূল দৈব-শাস্তির নিমিত্তে এক মহাযজ্ঞ আরম্ভ করেছেন ।—

পদ্মা । ভগবতি, আমি কি সে ত্রীচরণের আর এজ্ঞমে দর্শন পাব । ( রোদন । )

গৌতম । বৎসে, তুমি শাস্ত হও, মহর্ষির যজ্ঞ কখনই নিষ্ফল হবার নয় ।

পদ্মা । ভগবতি, আপনি যা আজ্ঞা কচোন সে সকলই সত্য, কিন্তু আমি এ নিরোধে প্রাণকে কেমন করে প্রবোধ দি । হায় ! এ কি আর এখন কোন কথা মানে ? ( রোদন । )

গোঁত । বৎসে, বিবেচনা করে দেখ, এ অখিল ব্রহ্মাণ্ডে কোন বস্তুই চিরকাল শ্রীভ্রষ্ট হয়ে থাকে না । বর্ষার সমাগমে জলহীনা নদী জলবতী হয়,—ঋতুরাজ ধ্বসন্ত বিরাজমান হল্যে লতাকুল মুকুলিতা ও ফলবতী হয়,—রুক্ষপক্ষে শশীর মনোরম কান্তির হাস হয় বটে, কিন্তু আবার শুষ্কপক্ষে তার পূরণ হয়,—তা তোমারও এ যাতনা অতি শীঘ্রই দূর হবে ।

নেপথ্যে । ভো শার্ঙ্গরব, ভগবতী গোঁতমী কোথায় হে ! দেখ, দুইজন অতিথি এসে এ আশ্রমে উপস্থিত হয়েছে, অতএব তাদের যথাবিধি আতিথ্য কর ।

গোঁত । বৎসে, এক্ষণে আমি বিদায় হল্যেম্ । তুমি এই তরুর ছায়ায় কিঞ্চৎকালের নিমিত্তে বিশ্রাম কর । দেখ ! ভগবতী তমসার নির্মল সলিলে কমলিনী কি অনির্ভরচনীয় শোভাই ধারণ কর্যে বিকশিত হয়েছে, তা তোমার বিরহ-রজনীও প্রায় অবসান হয়ে এলো ।

[ প্রস্থান ।

পদ্মা । ( স্বগত ) প্রাণেশ্বর যে সংগ্রামে বিজয়ী হয়েছেন তার আর কোন সন্দেহ নাই, কিন্তু এ হতভাগিনীকে কি আর তাঁর মনে আছে ? ( দীর্ঘনিশ্বাস পরিত্যাগ করিয়া ) হে বিধাতঃ ! আমি পূর্জন্মে এমন কি পাপ করেছিলেম যে তুমি আমাকে এত দুঃখ দিলে । তুমি আমাকে রাজেন্দ্র-মন্দিরী, রাজেন্দ্রগৃহিণী করেও আবার অনাথা যুথভ্রষ্টা কুরঙ্গিনীর মতন বনে বনে ফেরালে । ( রোদন । )

নেপথ্যে । প্রিয়সখি, কৈ, তুমি কোথায় ?

পদ্মা । ( নেপথ্যাভিমুখে দৃষ্টিপাত করিয়া ) কেন ? এই যে আমি এখানেই আছি ।

( বেগে সখীর প্রবেশ । )

সখী । প্রিয়সখি—( রোদন । )

পদ্মা । ব্যগ্রভাবে সখীকে আলিঙ্গন করিয়া ) এ কি ? কেন ? কেন সখি, কি হয়েছে ?

সখী । ( নিরন্তরে রোদন । )

পদ্মা । সখি, কি হয়েছে তা তুমি আমাকে শীঘ্র করে বল ?

সখী । প্রিয়সখি, মহারাজ আৰ্য্য মাণবকের সঙ্গে এই আশ্রমে এসে উপস্থিত হয়েছেন ।

পদ্মা । ( অভিমান সহকারে ) সখি, তুমিও কি আবার আমার সঙ্গে চাতুরী কত্যা আরম্ভ করলে ?

সখী । সে কি ? প্রিয়সখি, আমি কি তা কখন পারি ? ঐ দেখ, ভগবতী গৌতমী মহারাজ আর আৰ্য্য মাণবককে লয়ে এদিকে আসছেন । কেমন, আমি সত্য না মিথ্যা বলেছি ? ( নেপথ্যাভিমুখে অবলোকন করিয়া ) আহা ! মহারাজের মুখখানি দেখলে, বোধ হয়, যে উনি তোমার বিরহে অতি দুঃখে কালযাপন করেছেন ।

পদ্মা । ( নেপথ্যাভিমুখে অবলোকন করিয়া ) কি আশ্চর্য্য ! সখি, তাই ত । বিধাতা কি তবে এত দিনের পর আমার প্রতি যথার্থই অনুকূল হলেন । ( রাজার প্রতি লক্ষ্য করিয়া ) হে জীৰ্বিতেশ্বর, আপনার কি এত দিনের পর এ হতভাগিনী বলে মনে পড়লো ? ( রোদন । )



সখী। প্রিয়সখি, চল, আমরা ঐ বৃক্ষবাটিকায় গিয়ে  
দাঁড়াই। মহারাজকে তোমার সহসা দর্শন দেওয়া উচিত  
হয় না।

[ উভয়ের প্রস্থান।

( রাজা ও বিদুষকের সহিত গৌতমীর পুনঃ প্রবেশ। )

গৌত। হে নরেশ্বর, তার পর কি হলো ?

রাজা। ভগবতি, তার পর আমি রাজমহিষীর কোনই  
অন্বেষণ না পেয়ে যে কি পর্য্যন্ত ব্যাকুল হলেম্, তা আর  
আপনাকে কি বলবো। আর এ ছরুহ শোকানল সহ কতো  
অক্ষম হয়ে, রাজমন্ত্রীর উপর রাজ্যভার অর্পণ করে, এই আ-  
মার চিরপ্রিয়বয়স্কের সহিত তীর্থ পর্য্যটনে যাত্রা কলেম্।

গৌত। হে নরনাথ, আপনি এ বিষয়ে আর উদ্বিগ্ন হবেন  
না। রাজমহিষী এই আশ্রমেই আছেন। মহর্ষি অঙ্গিরা  
তাঁকে আপন ছহিতার ন্যায় পরম স্নেহ করেন। আর তাঁর  
আগমনাবধি বহুযত্নে তাঁর রক্ষণাবেক্ষণ করেছেন।

রাজা। ভগবতি, সে সকল বৃত্তান্ত আমি দেবর্ষি নারদের  
মুখে বিশেষরূপে শ্রুত আছি। কুলায়ত্রফা পারাবতী আশ্রয়-  
আশায় কোন বিশাল বৃক্ষের সমীপে গমন কল্যে, তরুণের কি  
শরণদানে পরাণ্ডু মুখ হয়ে, তাকে নিরাশ করেন? ভগবান  
অঙ্গিরা ঋষিকুলের চূড়ামণি, তা তিনি যে এরূপ ব্যবহার কর-  
বেন, এ কিছু বড় অসম্ভব নয়।

গৌত। হে পৃথ্বীশ্বর, আপনি এই শিলাতলে ক্ষণেককাল  
উপবেশন করুন, আমি গিয়ে রাজমহিষীকে এখানে লয়ে  
আসি।

রাজা । ভগবতি, আপনার যা আজ্ঞা ।

গোঁত । আর আপনার এ আশ্রমে শুভাগমনের সংবাদও মহর্ষির নিকট প্রেরণ করা উচিত । অতএব আমি কিঞ্চিৎ-কালের নিমিত্তে বিদায় হলেম ।

[ প্রস্থান ।

রাজা । ( উপবেশন করিয়া ) সখে, যেমন তপনতাপে তাপিত জন সূশীতল তরুছায়া পেলে পূর্বতাপ বিস্মৃত হয়, আমারও আজ অবিকল তাই হলো ।

বিদু । আজ্ঞা, তার আর সন্দেহ কি ?\* এত দিনের পর আমাদের ডিঙ্গাখানি ঘাটে এসে লাগলো । কিন্তু এ ঘাটটা আমাকে বড় ভাল লাগছে না ।

রাজা । কেন, বল দেখি ?

বিদু । বয়স্য, এ মুনির আশ্রম, এখানে সকলেই হবিষ্য করে ; তা আমরাও কি একাহারী হয়ে আবার মারা পড়বো ?

রাজা । কেন ? তুমি ত আর সন্ন্যাসধর্ম অবলম্বন কর নাই, যে তোমাকে একাহারে থাকতে হবে ?

আকাশে । ( কোমলবাদ্য । )

রাজা । ( গাত্রোত্থান করিয়া সচকিতে ) এ কি ? আহা ! কি মধুর ধ্বনি ! সখে, আমি যে দিন মায়ামৃগের অনুসরণ করে বিষ্ণুচলে দেব-উপবনে উপস্থিত হয়েছিলেম, সে দিনও আকাশে এইরূপ কোমলবাদ্য শুনেছিলাম ।

বিদু । ( নেপথ্যাভিমুখে অবলোকন করিয়া সত্রাসে ) কি সর্কনাশ !

রাজা । কেন ? কি হলো ?

বিদু । মহারাজ, চলুন, আমরা এখান থেকে পালাই । ঐ দেখুন, এ আশ্রমবনে দাবানল লেগেছে । উঃ ! কি ভয়ঙ্কর শিখা !

রাজা । ( অবলোকন করিয়া ) সখে, ও ত দাবানল নয় ।

বিদু । বলেন কি ? মহারাজ, ঐ দেখুন, সব গাছপালা একবারে যেন ধু ধু করে জ্বলে উঠছে ।

রাজা । কি হে সখে, তুমি অন্ধ হলে নাকি ?

বিদু । বয়স্য, তবে ও কি ?

রাজা । ওঁরা সকল দেবকন্যা । তা ওঁরাও অগ্নিশিখার মতন তেজস্বিনী বটেন । ( অবলোকন করিয়া সানন্দে ) কি আশ্চর্য্য ! এই যে শচীদেবী, যক্ষেশ্বরী, আর রতিদেবী আমার প্রেয়সীকে লয়ে এ দিকে আসচেন । হে হৃদয় ! তুমি যে এতদিন এ পূর্ণশশীর অদর্শনে বিদীর্ণ হও নাই এই আশ্চর্য্য ! ( অগ্রসর হইয়া ) এ দাস আপনাদিগের শ্রীচরণে প্রণাম কচে । ( প্রণাম । )

( শচী, মুরজা, রতি, গৌতমী, পদ্মাবতী, সখী,  
নারদ, এবং অঙ্গিরার প্রবেশ । )

সকলে । মহারাজের জয় হউক ।

নার । হে মহীপতে, যেমন মহর্ষি বাল্মীকির পুণ্যাশ্রমে দশরথি ভগবতী বৈদেহীকে প্রাপ্ত হন, আপনিও অশ্রু তদ্রূপ মহিষী পদ্মাবতীকে এই স্থলে লাভ কল্যেন ।

অঙ্গি । হে নরশ্রেষ্ঠ, আপনার বাহুবলে ঋষিকুলের সর্বত্রই কুশল । অতএব আপনি পুরস্কারস্বরূপ এই জ্বী রত্নটি গ্রহণ করুন ।

শচী । ( রাজার হস্তে পদ্মাবতীর হস্ত প্রদান করিয়া )  
হে নরনাথ, আপনি অদ্যাবধি নিঃশঙ্কচিত্তে রাজ-সুখভোগে  
প্রবৃত্ত হউন ।

আকাশে ।

গীত ।

[ বেছাড়া—পোস্তা । ]

সুমতি ভূপতি, তুমি ওহে মহারাজ ।  
সুখে থাক ধনে মানে, রিপুগণে দিয়ে লাজ্ ।  
পাইলে হারা নিধি, প্রিয়তমা পুনরায়,  
বাসনা পূর্ণ হলো, সুখে কর রাজকাজ ।  
হয়ে সুবিচারে রত, কর বহু যশোলাভ,  
যেমন শোভে ক্ষিত্তি, তারাপতি দ্বিজরাজ ॥

( পুষ্পবৃষ্টি )

সকলে । রাজমহিষী চিরবিজয়ী হউন ।  
নার । ( রাজার প্রতি ) আমিও আশীষ করি, শুন নরপতি !—  
সুখে সদা কর বাস অবনী-মণ্ডলে,  
পরাভবি শত্রুদলে, মিত্রকূলে পালি,  
ধর্মপথগামী যথা ধর্মের নন্দন  
পৌরব । চরমে লভ স্বর্গ ধর্মবলে ।  
( পদ্মাবতীর প্রতি ) যশঃসরে চিরকুচি কমলিনীরূপে  
শোভ তুমি পদ্মাবতি—রাজেন্দ্র নন্দিনি,  
যযাতির প্রণয়িনী দৈত্যরাজবালা  
শর্মিষ্ঠা যেমতি । তার সহ নাম তব

গাঁধুক গোড়ীয়জন কাব্যরত্নহারে,  
মুকুতা সহ মুকুতা গাঁথে লোক যথা ।

( যবনিকা পতন । )

ইতি পঞ্চমাক্ষ ।

এষ সমাপ্ত ।